


大正

陳昌吉  
同治庚午  
吳興



人海記



海昌 查慎行 悔餘纂



蘇子瞻詩云惟有王城最堪隱萬人如海一身藏  
與東方曼倩陸沉金馬之意寄托畧同余自甲子  
夏北遊太學又九年舉京兆秋試又十年唱第南  
宮其後供奉 內廷者七年從事書局者三年迨  
癸巳夏移疾乞歸年已六十有四矣通計三十年  
來客居京師歲月過半其間耳目見聞隨手綴錄  
零丁件系不下數百條雪窗檢點哀集成卷命曰  
人海記

本朝初年滿洲官員支俸不支薪漢官則俸薪並支順

人海記

一 汲脩齋校本





治甲午停秋冬二季俸有以停俸不停薪請支折薪銀者以薪侈于俸也如四品官季給薪三十金俸纔二十金耳內院不許謂滿洲方在此論薪俸何得濫也明年漢官但給俸不給薪矣宋右君司空云故事舉行計典後臺省例有拾遺順治丙戌部院大計群吏止據撫按所揭以黜陟臺省欲循故事內大臣不欲也陳溧陽額力主之臺省拾遺奏上多被反坐己丑大計鑒前事雖有糾拾亦僅耳其後遂停吾邑楊少司馬離為副憲時復請舉行拾遺格于部議不果督撫之權漸重矣

內閣判日俱用墨筆以票旨硃筆避尊也此制起于明朝但外而九列至斗食之吏皆硃批獨不嫌僭上何也八旗官兵內城分駐之地國初各有地界正黃旗則正陽門鑲黃旗則東直西直二門正藍旗則宣武門鑲藍旗則崇文門正紅旗則德勝門鑲紅旗則阜城門正白旗則朝陽門御鑲白則安定門

漢太官園種冬生韭蔥菜茹晝夜燃蘊火待溫氣乃生事見漢書召信臣傳今都下早蔬即其法蓋明朝內監不惜厚值以供御庖嘗聞除夕市中有賣王瓜二枚者內官過問其價索百金許以五十金市者大笑故噉其一內官亟止之所餘一枚竟售五十金而去

吾鄉呼林檎為花紅北人呼為沙果又柰似林檎而小



北人曰虎喇攢

北方無筍惟冬筍用茅竹筒封貯從江南馬上販鮮十餘日到京每劬價值四五百錢春夏之交食蘆薈蒲芽摠名為筍詩云維筍及蒲則蒲與筍故當有別

佐領即牛录也秩如明朝千戶專管戶籍秩雖卑凡位居公侯伯者並俯聽其派撥亦猶縣令之轄鄉紳

滿洲八旗騎兵月餉七兩五錢步兵三兩四錢綠旗騎兵月二兩步一兩五錢城守兵月一兩水師同達月盡扣銀五分謂之朋椿官馬斃則以此項買補凡騎兵止給官馬鞍轡自備

滿洲子弟入學倡于順治辛卯壬辰時范文程當國初

試百四十人入庠歲考止三等上者賚絹二疋其赴科舉初場止二義廣甯楊方興山陰沈文奎並解元麻勒吉為狀元另為一榜戊戌以後乃列名漢人榜間亦有成七義者矣

初徙八旗圈順天永平保定河間之田凡腴畝善宅俱歸旗下謂之莊子順治癸巳以水災四時府莊子俱荒欲改圈真定順德廣平大名地戶部持之不行

漂陽相國以甲午三月賜死時年五十宣武門內靈宮殿及杜郵之地也

陝西織造絨褐者本朝初年設有專員順治辛卯始省以此項錢糧充餉



世祖章皇帝于甲申十月朔入燕甫七歲是日一御殿自後元旦萬壽節俱免朝賀至庚寅正月朔始御殿受賀

順天鄉試初用考試官四員內備滿洲二人主八旗蒙古應試者後止二員並用漢人

滿洲編檢視漢官俱晉一品而于滿人為卑以滿官止七品也

吏兵二部每月選期舊于天安門外兩廊設矮几鋪紅毡席地而坐尚書二人正面吏部西向兵部東向侍郎傍列其餘官筆帖式以次排比選人於前唱名掣籤今兩廊列牆屋各官俱露坐

順治甲午正月始頒文武諸臣制誥封贈八旗勳衛數萬人其祖父之名類皆闕失意不欲制詞漢官力爭之于是內院擇坊局史官十六人分撰自一二品始一品限十二句二品十句三品八句句各四字不用故實順治癸巳三月廿五日改鑄朝鮮國王印兼滿漢文以從前止漢篆也

出繼之子離任為本生父母治喪自北平朱君右君諱之弼先生始先生時官戶部侍郎其後大臣遂援為例西洋人生日不論本誕如立春日生其日無定期或十二月或正月遇此節是也

回回人雖在中國不奉正朔自有回曆亦不限十二



月為一年別有歲朝每年不同乙丑八月初三日為羣聚慶會之期余在都下親見之

皇城西苑萬歲山上以僧言建白塔三層形如瓶按元世祖至元二十八年五月丁巳從楊璉真珈之請于臨安建白塔二各高一丈二尺以居咒師朵四的性吉等七人其事本此

每歲元旦昧爽未謁太廟先上堂祭乃鄧將軍廟也在朝門之巽隅庭列劍戟自車駕外侍從皆匍匐而入非親昵者不得隨行按鄧諱子龍南昌人萬曆中副總兵四川開科始順治辛卯解額七十二人喪亂之後舉子止二百餘人主司駐保甯寓試道士院時有亭溪之警

急于竣事二三場併日

聞河舟阻官舫于總河處求給讓行牌以先商賈今無此例矣

永城人宋獻策明末賣卜燕市遇李自成拜國師導之入都自成敗後滿洲重其術隸旗下其人至康熙初年乃死

南京後湖貯各省戶口田糧冊有明終始計一百七十萬本南渡後用以造甲點火藥至本朝僅存萬曆間及崇正禎五年者朝議謂本四五勛鬻之可得四五萬緡貢士闕落卷自順治乙未始禮科議南卷十中其一而江西僅七人物議者籍于是大總裁金之俊等奏落



卷貽于順天府許貢士赴闕限六日不得領回前此未之聞也

翰林外轉順治乙未九月始行之編檢則范周沈荃盧高湯斌耿介崔之瑛馬燁曾等少詹以下開坊以上則黃志遠楊思聖王舜年藍潤王元咎陳曠等十八人皆以品行清端才猷贍裕各照外轉應得職銜陞一級遇缺即補康熙戊辰編檢汪楫丁廷樾李濤三人以知府用辛未冬少詹徐潮轉通政司侍讀胡會思轉光祿寺少卿侍講熊賜瓚轉大理寺丞高喬勵杜訥俱轉通政參議宮坊李應薦轉太常少卿周清源轉參議司業吳涵轉參議

燁吳在作贖

吳在作贖

吳在作贖

吳在作贖

正陽門一條

昭代叢書不載

世祖常言明朝之亡由周延儒馮涿州少子娶宜興從女初頗為解上不以為然又問周延儒有子官翰林今安在銓詭對曰庶吉士周奕封非延儒子也時奕封請假在籍乙未秋還朝俄除知縣乃涿州希旨外之也各鎮總兵官銜帶都督同知或僉事在明朝有五軍都督府故也今都督府已裁而總兵仍兼此銜甚屬無謂正陽門外窮市有古鐵長三尺許衡二寸形若草帶中空外鑄而背隱起釘如鼓不甚可辨一日高麗使見之售以五十金云此定水帶也禹治九州作九帶此其一也若航海：水鹹不可飲以帶投之甘冽故貴耳市中小好事者隨至會同館汲苦水石餘投鹽數觔揉之使濁



乃投帶于中沸涌作魚眼數十少頃味極甘冽明季  
大學石鼓文舊有六百五十七字元至元中存者三百  
八十六字今所存字但三百二十五而已

西山碧雲寺俗名于公寺後為正德大璫于經墓土木  
華麗凡賜祠五多祔冢中央豐碑二道正面無文其碑  
陰詳刻魏忠賢爵里姓名意殊駭異詢之守者云忠賢  
名下蘇應宣咸嘗被掠于建州從本朝入燕葬其  
衣冠于此余憤甚直前沒之時與朱大空同遊公不以  
我為狂也。按碧雲寺忠賢重修天啟三年少師葉向  
高撰記禮部尚書會稽錢象坤篆額今碑磨去錢象坤  
姓名意作相時事也福清記中亦頗稱許魏氏

去香山二星里許

星字陳抄本沈刻本均參

香山永安寺來青軒額明神宗手書軒之前有山突起  
金章宗祭星臺也下有護駕道松覆之稱護駕松今尚  
存其一

弘光寺在香山絕頂永樂間太監鄭和建和朝鮮人四  
使本國中有佛形圓而入觚云東國之制

去香山二星里許為鮑公寺亦內官墓中有白松八株  
圓皆三抱掩映殿宇人行其下衣上不見日色

盧師山清涼寺中秘魔崖古柏一株長可尺許橫出石  
縫不凋不榮云盧師手植也石經山亦有古柏一萬歷  
初上過之御書靈根古柏四字

大功德寺舊名護聖寺直金山口與景陵相近宣德朝



雪峯大覺師禪駐錫于此宣帝御賜詩當年天下選高僧  
 獨取尊師第一名即指雪峯也園陵自景皇帝外又有  
 懷獻悼恭東仲莊敬憲懷獻懷悼懷故太子七衛許忻申  
 蔚岳景顙戚薊均靖郊簡懷悼故王十六殤主二十六  
 仁宗妃三宣宗妃一英宗妃憲宗妃十二按史皆葬金  
 山皆景陵相屬凡五十三園今不可別識矣  
 吾邑譚孺木先生遷留心明朝典故不以詩名然其北  
 遊集中如過文信公祠七律一聯若云丞相宜全節敢  
 謂書生合出山過陳溧陽里第云往事思仇虛偃月新  
 編賢否總消魂陳餘刎頸交何在范蠡扁舟事可行過  
 惠安伯張氏墓云翁仲似人能化石杜鵑本鳥不離枝

贈王玄照太守云縱寫青山非舊日翠微雲亂夕陽中  
 過梅村先生值金壇王友三感舊云衣冠王謝多何益  
 門戶胥原大可憂南宋朝廷終覺小中原經濟亦難尊  
 贈太常道末太常云休屠祭後全非像博望歸時不待  
 槎除夕云春兼暘月人歸少寒倍燕京客受多如此之  
 類皆名句也

吏部楹帖明萬曆初冢宰錢塘張瀚立功名身外事大  
 就何妨小就何妨富貴眼前花早開也得晚開也得  
 西洋畫以胡桃油漬絹抹藍或綠或黑後加采焉不用  
 白地

海運道里詳梁太宰夢龍集中自淮安府至安東縣九



十里安東至馬洛關五十里馬洛至蘆浦四十里蘆浦  
至楊寨四十里楊寨至白沙關二十里白沙至雲梯關  
二十里雲梯至淮河套六十里淮河套至大海東洲山  
一百二十里東洲山至高公島三十里高公島至鷹遊  
山三十里鷹遊山至盧溝所十五里盧溝所至青口六  
十里青口至興莊五十里興莊至東流所百里東流所  
至擣一作落場三十里擣落場至信陽場百二十里信  
陽至齊堂島四十里齊堂至靈山島九十里靈山至竹  
槎島五十里竹槎至浮島四十里浮島至灣島六十里  
灣島至鰲山管島三十里管島至田橫島七十里田橫  
島至欽島十里欽島至青島百二十里青島至海洋所

灰島七里灰島至炕兒島十八里炕兒島元城島百二  
十里元城至雙駝埠二十里雙駝至甯津所八十里甯  
津至成山衛五十里成山至青雞島六十里青雞至羅  
山所五十里羅山至威海衛四十里威海衛至劉公  
島五里劉公島至甯海洲七十里甯海至空、島五十  
空、島至奇山所三十里奇山至福山縣三十里福山  
至登州新海口八十里新海口至沙門島六十里沙門  
至桑島五十里桑島至萊州岬岬島四十里岬岬島至  
三山島八十里三山島至芙蓉島五十里芙蓉至海倉  
百里海倉至魚兒鋪十里魚兒鋪至白浪河五十里白  
浪河至八溝河五十里八溝河至小清河二十里小清



崇吳本六百字然照  
北核之品三千三百四十五里  
吳本作三千三百九十里

河至清河五十里清河至絲網口十里絲網口至江全  
河十里江全河至大口子四十里大口子至大清河十  
里大清河至唐頭寨十里唐頭寨至小沙河五里小沙  
河至渾水汪十五里渾水汪至降河三十里降河至久  
山河十里久山至大沙河二十里大沙河至泊油河十  
五里泊油至套河十五里套河至沙頭河十里沙頭至  
大溝河三十里大溝至桑甸河三十里桑甸至徐家溝  
十里徐家溝至乞溝河七十里乞溝至大沽河二十里  
大沽至天津衛百五十里天津至張家灣百八十里竟  
云八通計淮安至張家灣海道水程共三千三百四十  
五里

隆慶辛未海運初僱海鷗船五隻分載米二千石每駕  
船十二人自淮安至天津試運無碍海道灣泊舟行停  
泊宜在舊設墩上晝設旗幟夜懸燈籠以便趨集嘗致  
平江伯陳瑄督海運于靈山建烽火臺高三十餘丈今  
宜師此意多為標識云棗林雜俎

大明官制一書不載翰林院庶吉士蓋官制定于洪武  
年間而庶吉士則始于永樂二年甲申也似宜補入按  
永樂二年三月己酉選庶吉士楊相等五十人並習湯  
流王英等十人並習書四月甲申進士沈升等俱改庶  
吉士修書五月辛丑諸司辦事進士能書者曾慎等二  
十九人為庶吉士一科凡四進



崇文門外二里大通橋東園舊曰卷鹿處地平如掌漫行可數里名鹿園

寶坻銀魚似吳中鱠殘而大倍之出海中船山下霜降後沂流而上育子諸淀中夏霧映日波浪皆成銀色土人候其至網之瓦窰頭出者尤佳明朝命內監提督冬月抱子以冰進縣設六廠漁戶一百七十人歲進凡七次

蘆溝橋石獅兩行共三百六十八

石經山在房山縣西南四十里生懋題草他處所無

長平公主崇禎周后所出甲申春年十五議降周太僕某子世顯將築館遭國變帝以御劍斫右臂斷腕賊以

按一本云懋古前字懋  
此縣名見前道地理  
按此宗見查清輯詞

貴主已殞授尸國戚五日復甦順治二年公主上書願皈依空門上不許詔求元配周世顯應詔起即故武清侯之第賜金錢牛車庄一區田若干頃俾成禮時乙酉六月上浣也明年丙戌八月十八日薨年十七詳華亭人張宸記事及吳梅村集中孫侍郎春明夢餘錄則謂公主甲申年十五傷右臂肩際明年乙酉九月成婚丁亥年卒年月互異不知孰是

華亭王圻續文獻通考藝文類中載琵琶記樂府水滸傳又明朝宗室鄭越襄荆淮滕梁衛八王並仁宗子而云成祖子其誤尤甚

京城各巷曰某衙衙其義無所出謝肇淛五雜俎曰闔



中方言家中小巷謂之弄南史東昏侯遇弒于西弄即巷也元朝經世大典謂之火街後因訛為衎衎

惠世揚米脂人萬曆甲辰進士歷刑部侍郎李自成故牧卒也嘗給事世揚之家及僭號語人曰得惠先生來則幸甚因致書世揚即至拜右平章事時左平章則牛金星也自成敗從本朝兵入燕三年不見用後放歸綏德副總兵王永強作亂劫世揚從軍敗于朱原鎮永強自縊世揚不知所終棗林雜俎

北京戶部節慎庫金銀元寶各一蓋鎮庫之物以梯登其上其邊尚高于人上刻永樂九年

左羅石懋第北使被幽和光敗報至攝政王使人宴左

侍郎飲酣語曰此太平宴也左問所自曰江南破矣左悲不勝仆席于地作絕命詩閏六月十八日遇害都人吳某收殮同時被難者五人其一則兵部司務加職方主事崑山陳用極也棗林雜俎

姚廣孝謚恭襄初從事太廟嘉靖中移祀太隆善寺故元崇國寺也今斥為馬廐

崇文門內舊有于忠肅公祠萬曆乙未二月己未勅建額曰忠節本朝順治中公之像傍被毀吾邑人譚孺木作帛于太傅祠文以憫之今相傳為京師城隍神

南京靈谷寺琵琶街側有八功德水今涸按八功德水見佛書在天竺國一清二冷三香四柔五甘六淨七不

今相傳以九字一本小注  
于下  
吳其未及字下有也日二字



噎八除病

各省俱有湯泉北直十三江南十三山西十一山東十七河南十陝西十四江西十七湖廣十六四川八福建六十一廣東十五廣西三雲南十八浙江三貴州二大抵其下有白礬丹砂硫黃三物乃蒸氣為煖流後周王褒溫泉銘云白礬上徹丹砂下流明廣陵桑喬云雷火所灼其氣亦疏蓋極陽之氣也

明朝諸陵孝陵祔在應天府朝陽門外鍾山懿文太子祔墓于側曰東陵長陵祔在昌平州城北天壽山自紅門進御道凡二十餘里舊名東祔子山永樂七年卜建改名天壽後視高山數十重來龍跌斷明堂平濶祔葬

十六妃獻陵熙在長陵右祔葬四妃景陵禋在長陵左

祔葬七妃裕陵順去昌平二十五里獻陵之西祔葬十

八妃茂陵傲去昌平二十七里裕陵西北祔葬十四妃

泰陵泐在茂陵西無祔康陵德去昌平三十五里泰陵

之西九龍池環其前永陵壙去昌平十八里長陵之東

南兵部侍郎姚駱用御前所擇祔葬妃三十嬪二十六

昭陵隆定陵麟在大峪嶺尚書徐學謨所擇時通政司

參議梁子琦等難之為輔臣申時行王錫爵所斥崇禎

初尚書姚思仁督理多朽石吾邑陳與郊以給事中巡

工言壽宮五室中三間待馭四隅維以鉄索各大銅缸

注油左右室通門待中宮及嗣帝所生母升祔神廟閱



壽宮自坐石室飲酒慶陵驀德陵既石橋高不五尺長不五丈砌石無多而耗二十萬金且陵地窄甚僅當兩山之腋在永陵左砂相距不百步也思陵襟在紅門西三里與諸陵隔河諸陵在河北思陵獨在河南即故皇貴妃田氏園諸陵明樓俱有碑題某宗皇帝之陵積思門內有碑俱無字閑以木柵本朝入關惟定陵獨被燬餘仍令太監守護康熙二十〇年添設守備一員

皇城北苑中有廣寒殿相傳遼后梳妝樓成祖定鼎北京勿毀以垂鑒戒萬曆七年五月四日樓傾梁上金錢百二十文云至元通寶則樓創于元初非遼時物矣

陵雜著

涿州桑乾河中有捨名鎮河嘉靖元年捨崩內有古錢皆飛空如蝶自後河水不時泛溢涿州志

都御史葉盛巡撫宣大于沿邊孔道俱設煖鋪即唐人邊鋪也

蘇州冰廠明季已有之凡十六所本朝兵始至問廠何為曰藏冰者謂伏兵也焚其五始悟

一品榮歸日雙親未老時嚴文靖公無毀無譽三代直道

而行知止知足四時成功者退神財不求羸敢為子孫益過位嘗踰分當思思齒德難兼韜觀此足見盛

世縉紳氣象

沙河縣宋文貞公璟碑斷沒土中正德丁丑縣令方思

吳李德字伯角字



道治錢二百斤貫而續之今尚存不甚剝蝕德清譚未  
菴宰此邑曾以榻本見貽  
保定有定爵霸城宋楊延朗所築金時以其磚他用其  
土基尚存嘉靖間霖雨潰城西北隅得骨數十具植立  
土中髑髏各戴兜鍪旁倚兵仗石刻云活藥墻工百戶  
徐瑾一行兵役見者悚然長安客話  
成化初韓襄毅雍南征平大藤峽賊斬大藤中空鞞草  
為鼓置參軍府前聲震數里兵使某移于行臺扣之無  
聲移歸故處聲復鳴

京師皇城內西苑古檜一松四並金時植嘉靖中封松  
為指揮使其俸米專飯孤貧

國子監文廟古柏並元許文正公手植

京師外城天壇坊榆錢凡榆春錢獨天壇之榆以秋  
報國寺舊有矮松二株其右尤奇幹長不過數尺而枝  
橫數丈文人往、觴詠其旁自內城、隍廟市移于此  
每月三度為棉馬之具數年來無復存矣

槐樹斜街即土地廟斜街舊時古槐夾路今每月逢三  
日為市集槐亦僅有存者

昌平州天壽山古槐相傳竇禹鈞家物樹中枵可布三  
五席稱竇家槐按禹鈞周之諫議大夫也故居在薊州  
城東今其地尚有竇氏莊

涿州西南十五里樓桑村照烈故居按本紀道右有大



桑高十丈如羽葆乙丑二月同楊而木游此覓土人為  
向導至則頽垣破廟間所謂樓桑無能指其處者廟創  
于唐初乾甯五年先主像與關並列  
三峽產雲南稗一名鷹爪稗播種畦植與五穀爭價他  
處所無也

遼陽東二百餘里山深林密不見日色下產人參其苗  
高百草之上採者以夏五月裹糧披榛而入或迷徑為  
虎狼所噉或人相遇弱者死强者攫所有而出以地近  
皇陵恐傷龍脈邇者挖參之禁甚嚴罪至誅死而趨利  
之徒輕生不顧也

大內多異物歲一閱視出之廷有瓜子長五六寸濶如

之不知何地所產袁貴妃父祐說見楊士聰玉堂薈記

早金蓮花五臺山出瓣如池蓮較小色如真金曝乾可

致遠初友自山西歸有分餉者以點茶一甌置一朶花

開沸湯中鮮新可愛後扈從出古北口外塞山多有之

開花在五六月間一入秋莖株俱萎矣

各省歲貢芽茶共四千二十二斤內江南宜興縣百斤

六安州三百斤廣德州七十五斤建平縣二十五斤浙

江長興縣三十五斤即芥茶嶺縣十八斤會稽三十斤

永嘉十斤樂清十斤臨安二十斤富陽二十斤慈谿二

百六十斤宋置茶局進麗水二十斤金華廿二斤一本

仁龍海等縣共二十斤臨海等縣共十五斤建德五斤



淳安五斤遂安壽昌二縣共六斤桐廬二斤分水一斤  
江西南昌府七十五斤南康府二十五斤贛州府十一  
斤袁州府十八斤臨江府四十七斤九江府百二十斤  
瑞州府三十斤建昌府二十三斤撫州府二十四斤吉  
安府十八斤廣信府二十二斤饒州府二十七斤南安  
府南康縣十斤湖廣武昌府六十斤岳州府湘陰縣六  
十斤寶慶府邵陽縣二十斤武岡州二十四斤新化縣  
十八斤長沙府安化縣二十二斤寧鄉縣二十斤益陽  
縣二十斤福建建寧府建安縣一千三百六十斤內探  
春二十一斤先春六百四十三斤次春二百六十三斤  
紫箬二百二十七斤薦新二百一斤崇安縣九百四十

一斤內探春三十三斤先春三百八十九斤次春一百五  
十斤薦新四百二十八斤○南宋時蘇州茶額六千五  
百斤元無額明納錢三百十九萬三千有奇○成化三  
年南戶部奏准供用庫歲月芽茶坐派池州府三千斤  
一本三徽州府三千斤茶葉徽州府三千斤蘇州府三  
字作二千斤滁州三百斤徐州府二百斤  
吳本無和州三百斤  
廣德州三百斤○四川茶園十株取一徵茶二兩茶四  
十斤易蕃馬李文忠以茶五十餘萬斤易馬一萬三千  
五十八匹今茶課本色十五萬八千八百五十九斤係  
石泉建始長寧等縣并建昌天全烏蒙鎮雄永寧九姓  
土司辦納○陝西茶課今五萬一千三百八十四斤係



興安紫陽石泉漢陰西鄉歲辦。宋元時貢芽茶以建  
安為上明朝不貢閩茶即貢亦備宮中浣濯甌盞之用  
貢使率費銀抵京買納間有採辦亦取諸延平非武夷  
也延平人呼置茶者曰碧璽

龍生九子蒲牢好鳴囚牛好音螭吻好吞嘲風好險睚  
眦好殺鬪鬪好文狴犴好訟狻猊好坐霸下好負又博  
物志憲章好囚饕餮好水蟋蟀一作好腥蟻蚱好風雨  
螭虎好文采金猊好烟椒圖好閉口蚶蚶好立險鰲魚  
好火金吾不睡皆龍種也好立險吳本作立陰  
平湖徐在中以工部郎分司張秋張真人舟過其侍兒  
膚貌清麗徐見而謔之真人先生宜自重此某地龍也

徐不信命進盤水侍兒躍入雷雨應時而作

萬歷己卯行人謝杰使琉球航海颶風大作雷雨有龍

二掛于槽上一長年曰此來朝廟書早急扶杰起書免  
朝二字示之即退大作雷雨吳本作大雨兩

群龍交戲吳本無交  
字

龍涎香出蘇門答刺國其國西有龍涎嶼峙南巫里洋

洋中群龍交戲其上遺涎焉國人駕獨木舟伺採之每

一斤其國值金錢一百九十二枚准中國銅錢九千文

嘉靖三十四年下戶部取龍涎香百斤徧市不得廣東

藩司購每斤懸價千二百金僅得十一兩進內驗不同

仍亟取真者廣州獄囚馬那別的貯有一兩三錢上之

黑褐色密地都密地山夷人繼上六兩白褐色細間狀



云黑者採在水白者採在山皆真不膺尋有密地山商  
再上通前共十七兩二錢五分次年進內辨驗是真自  
後夷舶稍稍挾來定價每兩售百金其為用入香合和  
能斂腦射清氣數十年香味仍在熱之翠烟裊空不散  
涎沫有三品一曰泛水二曰滲沙三曰魚食泛水輕泛  
面涸人伺龍出隨取之可入香用滲沙則凝積多年滲  
沙中魚食則化糞散于沙上皆不中用而魚食又有二  
種海旁有花若木芙蓉者春夏間盛開花墮海中大魚  
食之或先食龍涎則腹中脹滿昂首向石上吐沫乾取  
可用惟糞者不佳

乾取一作乾收

宏治元年左副都御史邊鏞奏禁織蟒云爾雅蟒者大

蛇也蟒無角無足龍則具角足今織蟒俱龍非禮請禁  
之

脆蛇出崑崙山間人聲即寸斷人伺其斷鉗取之須寸  
各異處待風乾入藥若少頃無人聲寸寸仍續成蛇主  
治色癆及驚疑喪胆諸症本艸方書不載見玉鏡新設  
八梢魚灰褐色無鱗腹圓口生腹下後拖八尾產遼東  
海中永平太守盧騰龍以餽明相國庖人來詢魚治之  
法余亦不知也以意答之用滾水焯去其皮其尾如猪  
小腸而色較白寸斷之用葱韭雜炒及登盤腥氣觸人  
不堪下箸而一統志載入遼東物產太守以充土貢何  
所取也

太守盧吳本作盧太  
守



通州人葛原六以布衣獻鱮魚百尾時用法嚴或阻之  
原六笑曰爾不上食父母邪君猶親也庸何傷及至上  
召問曰魚羹何如對曰臣未進不敢嘗也上大說命賜  
酒食仍還其一日勞汝其後歲進至九十九尾著為令  
見東林雜組

永樂時山東進野蠶絲製衾薦太廟群臣稱賀今齊東  
山谷處有之與家蠶等蠶月種出蛾散置樹上聽其  
眠食食榭葉者名榭紬食椿葉者名椿紬食椒葉者名  
椒紬野人飼蠶架廬木林下手長竿逐樹按行為禦鳥  
鼠其穰者春夏秋歲三收焉有一種蠶之小者作蠶堅  
如石大才如指頂在深谷叢林間不關人力樵牧遇之

收曰山蠶

曰山蠶吳本  
作得小蠶

弋陽注少宰偉嘗赴中官席飯僅半甌香滑而膏異于  
常產問所出則蜀中歲進其米生于鷓鴣每尾止取二  
粒放去明年仍可取也

西苑獅日食一羊西域胡人主之白布纏首金帶衣綠  
友正三品料

明孝陵享殿太祖高皇后南向左淑妃李氏生懿文太  
子秦愍王晉恭王次皇妃某氏生楚王魯王代王郢王  
齊王谷王唐王伊王潭王又次貴妃某氏生湘王肅王  
韓王瀋王又次貴人某氏生遠王又次美人某氏生寧  
王安王俱東列碩妃生成祖獨西列見南京太常志孝



周定王橚吳本作椽

慈皇后顯然無子而奔州別集同姓諸王表自懿文成  
祖外秦愍王檿晉恭王桐周定王橚俱母高皇后吾學  
編亦然與志不合不可解也

閔字从吳下

鄭貴妃父承憲貧甚以女許孝廉某為妾臨別悲慟孝  
廉聞之遣還不責聘鄭感其意脫隻履與孝廉矢報已  
而入宮大得幸念前事而忘孝廉名命小璫售履于市  
索直若干無應者時孝廉計偕聞而往合其履妃泣告  
於上曰非若人妾不及執巾櫛矣亡何孝廉謁選得善  
地歷官監運使貴妃後生福王常洵有如意之愛上書  
其名于金盒屬妃藏之約他日以為東宮辛丑十月皇  
長子受冊貴妃持盒泣訴之上啟書字俱蝕嘆曰天也

妃卒後謚恭恪惠榮和靖皇貴妃

孝節貞肅淵恭莊毅烈皇后周氏父奎蘇州人微時寓  
京師寄食為人筦庫元配生子鑑繼丁氏生子某及后  
信王選妃后與焉信邸入正大位后生東宮及定王貴  
妃田氏生永王悼靈王貴妃寵日盛意圖奪嫡一日永  
和宮貴妃居婢于金梭猊下悞觸定王中宮銜之上每  
召貴妃妃例御鳳輿小璫昇之是日昇以宮婢上問故  
曰小璫多恣肆無狀扣其寔曰聞坤寧宮小璫狎宮婢  
故遠之耳上色動即搜其寢大得狎具蓋宮人各侶其  
璫所謂對兒也一名對食上驟怒立遣諸小璫中宮因

婢于金吳本無婢字

對恨成疾嘔血有老宮人曰田氏宮中獨無對兒乎亦



祥吳本作詳

可搜也已而果然上疑始釋都督田弘遇聞之大恐嗾  
貴妃上章引咎上意解令省愆例閉中門從旁門出且  
以章示中宮明無嫌也其章出御史湖南劉興祥于蓋  
弘遇所囑云貴妃薨明年春弘遇復進少女年十三見  
寵欲進封司禮太監某言某貴妃以選入非外進也乃  
止賜珠簾等物嗣後貴妃妹走天津珠簾仍在後為朝  
士某妾○按田貴妃名秀英其妹名淑英  
徐中山第三女名妙錦文皇欲娶為繼后女不可因不  
嫁而為尼嘗論革除事建文君當坐殿上燕王至苟不  
讓則死何必自焚竄每語遜國事未嘗不痛哭也  
崇禎十六年五月大學士周延儒放歸復見徵知不利

拜吳本作奉

求解于中宮賂嘉定伯周奎十萬金達之中宮請授指  
東宮東宮每晨謁及是啓曰近來久不見周先生何也  
上曰爾何自知周先生答曰父皇嘗稱周先生故知之  
上曰此非好人今不得稱先生上心知其奸尋賜死其  
日黎明錦衣并同法曹至私邸排闥而入家童各驚匿  
周求青衣未得緹校脫而衣之拜命飲泣求筆墨占句  
倉皇不屬使者促之投筆就縊  
萬曆十二年故太師張居正子禮部主事敬修自縊遺  
辭其畧云五月初三日邱侍郎至府初四日即差官提  
敬修面審大意坐先公以二百萬家貲又要扳承天夷  
陵本縣三家坐曾確菴家寄銀十五萬坐王少方家寄



銀十萬兩坐傳大川家寄銀五萬兩只得從當事之意料三家斷不能完結此事吾日後何面目見之又以母子叔姪恐團聚一處有串通之弊於五月一日出牌迫令隔別不得接語幽囚倉屋風雨蕭蕭、青草鳴蛙無不助予之悲悼遭時如此已無生路不得已托言片楮以代剖心此書送各司道一日五月十日寫完以期必遂而夢兆稍吉不果至十三日各欽差上司會審叔姪俱嚴刑拷訊父母遺體平生眼不見刑具脆薄之軀豈能勝之此數之莫可逃也在巡按活閻羅你也有父母妻子之念何忍殺人媚人如此之酷烈也有便乞傳山西蒲州張相公說張門事已完結矣無煩掛念願你輔佐

聖明天子于億萬年也云云按邱侍郎名檉齋人懸贖酷拷貽楚患數年卒無子任巡按名須更考

康熙己丑年元旦立春有大老署門云歲朝春百年難遇聖天子萬壽無疆崇禎元年元旦立春陳眉公用此聯作楹帖

郊上辛社稷上戊文廟上丁戊在丁後故先丁如十日丁則一日戊當先戊而後丁宏治間吏部主事楊子器上言戊從初十之丁則次戊非上戊也時無諳禮者竟寢不行李崆峒集

四明中秋宴飲以八月十六日相傳史彌遠官臨安還家度節阻風是夕始到遂沿為俗葉業師云



洪武十七年勅每月朔望祭酒以下行釋菜禮郡邑長  
以下詣學行香。按北齊每月朔祭酒博士諸生展拜  
階下郡縣朔朝朔日行禮始此其後遂以朔望行香朱  
子曰謁宣聖炷香不是古禮捨香不當叩頭只宜上捨  
香即出笏叩頭而拜由是觀之則宋亦然矣

康熙甲子秋九月海岱門內地中忽作聲有光如電初  
以為地震也已而知其地舊埋火藥覆以大石板上土  
厚尺餘不知何故忽發飛石所中凡傷二百餘人

無錫邵文莊寶二雨辨云雲興于山勃然湍盈既蘊而  
降以雨者山雲也謂之山雨雲興于海倏然瀰漫既翕  
而盛以雨者海雲也謂之潮雨海雲之雨乘風以行雷

鳴則止山雲之雨挾雷以動風吹則散海雨夏少而秋  
多山雨夏多而秋少

弘光初有攜日本山歷一紙來者字體並從本國書首  
題寬永二十一年及大將軍等字

房山縣石經山峰巒秀拔名小西天隋大業間僧靜琬  
懼本教有難不能流通發願募工鑿石刊造一大藏經  
積于此山至唐貞觀初僅成大涅槃一部靜琬沒後其  
弟子通刊造餘部歷遠金始完一大藏貯于岩洞者七  
地穴者三洞鑿以石門穴鎮以浮屠自來兵燹不之及  
泰山自下至巔五千三百八十四步五尺為步紆折皆在其  
中高三百八十六丈九尺一寸寔十四里零八十餘步



應劭漢官儀云自下至古封禪處凡四十里者妄也有  
泰山道里記沁水張大理五典云

二郎神即嘉州守趙煜斬蛟者也不知何代封為清源  
妙道真君

加陳本作那按續通  
鑑綱目作加無不傍  
輟耕錄作玠

靈隱飛來峰元僧楊璉真伽徧鑄佛像明嘉靖朝太守  
福清陳仕賢進士辰以楊及郊僧聞僧三石像斷其首瘞  
獄中獄中大疫或云悞毀佛像也

入蜀有三谷四道西南曰褒谷從褒入南曰駱谷從洋  
入東南曰斜谷從郿入其所從皆殊舊志謂首尾一谷  
者非也其棧道有四從成和階文出者為沓中陰平道  
鄧艾伐蜀由之從西當出者為故道漢高帝攻陳倉由

洋在陽谷吳本作駱

之從褒鳳出者為今連雲棧漢王之南鄭由之從城固  
洋縣出者為斜谷道武侯屯田渭上由之丁邠吾鄉許  
編修典四川鄉試欲強余同往余不果行為詳攷道里  
以當贈行之篇

甲申京師被陷始末詳設孺本金陵對泣錄中今全錄  
于後云光祿寺署丞膠州高弘高自賊中脫歸秋末省  
其兄相國備述前厄云三月己丑朔甲辰上召考選中  
外官三十三人于中左門諭曰國家多事南寇北虜闡  
寇已薄固關雖無確報可謂近于門庭朕已修省待咎  
此時何以撲勦何以安人心何以生財何以足用爾等  
其熟計之崑陽知縣黃國琦首對曰賊之驕由于招撫



從來招撫無裨于事上問安人心對曰安人心不難在  
于聖心安聖心安則人心自安上首肯筆記其名又問  
生財對曰今生財云加派云捐助俱非也豈非一而再  
再而三乎皇上宜搜內藏盡所有以為外用上又首肯  
因問用人對曰天下未嘗無人但人未必為用上大是  
之立除兵科給事中餘以次對未畢俄傳外札上手拆  
視訖倉皇遽退各官不敢散已傳駕回宮各官乃散知  
賊已至昌平也各官環閣臣于御河橋楊觀光等責以  
城守事魏藻德曰大家做靠不得一人是日內閣課庶  
吉士東宮日誦官劉理順何瑞徵誦論語首章未竟賜  
茶退夜二十刻部推左懋泰戎政兵部右侍郎總督城

守未報乙巳閉都門時傳吳三桂兵至不知即賊也夜

攻阜城門即平并廣寧門即彰西便門漏下二十刻砲

聲漸急丁夜後砲愈亟賊環攻有旨城堵尚虛一千八

百守卒俱稱無餉襄城伯李國楨不登陴丙午已刺賊

入阜城西便二門人不知也丁未昧爽市人云宮女出

西華門或傳聖駕昨出城辰刻宣武門北有內臣戎服

可千騎云王太監救火呼開門答以鑰在中府擊之鎖

未碎或云前門開遂沿至正陽門至則被天砲不可近

自長安右門還宮已刺賊入宣武門肆掠內臣被禍尤

慘李自成射承天門題榜矢中天字上馳入宮午刻偽

示五城購車駕所在戊申午前傳先帝自盡于煤山偽

沿至正陽門其本少至  
字



論明朝文武大小官員俱限次日赴各將軍帳下具職  
名彙冊送覽願復官者量才擢用不願復官者草職為  
民准給路引即放回籍敢有匿而不報兩隣長班房主  
一併誅戮自是各官俱分投職名權將軍李友家自己  
至酉共報七十三人劉球等其去者以草職回籍也主  
賊錄職名籍貫履歷寓舍僮婢長班錄訖皆驅對廳錮  
之工部侍郎陳必謙不即入擊以輿扛己酉先帝后移  
東華門蓆舍武選主事大足劉養貞出私錢八千得柳  
棺殯之先帝不幸時首露網右足靴身衣短後布衣胸  
題朕既喪國無顏冠冕見人是日同先后長椅昇出先  
后衣笄甚肅鼻微傷其裳紉給越三日賊出梓宮二一

吳本下  
婢字吳本作僕

丹漆一黝漆改殯焉先帝翼善冠龍袍玉帶滲金靴先  
后袍帶亦如之定王騎驃來臨不敢哭而去次東宮亦  
騎驃至青衣褻帽觸地良久雖不哭隱痛不能起賊擁  
之去諸臣臨哭可四十餘人臨而不哭者三十餘人養  
貞日侍側哀毀被執至李友家友據邱字衎衎許錦衣  
宅年五十餘性兇悍所錮各官許家人傳餐印其面而  
入出即去癸丑薄暮李友傳各官各據朝本朝見先祿  
寺監事林蘭友問朝本何若有佐史吳某云紅摺黃面  
開職名朝見蘭如其言餘倣之刑部尚書張忻言黃摺  
非所用付紅單職名酉刻李友列騎七十三隊隊騎各  
五露刃押諸臣赴窩鋪偽將劉宗敏拘千六百餘人夜



皇王吳本無此二字

半叱起俱蓬垢人予匹馬飛馳入西長安門出東長安門過御河橋皇王夾道進東華門始知非朝也至會極門偽相牛金星深衣盤坐棕毯上面東向右侍郎宋企郊盤坐金星側北向金星據縉紳一部珠筆點唱先令甲科打恭餘誦鄉貫諭高聲以應或托疾則令扶候合選即圍于錄上赴部聽銓選注畢且回各營奔仆數人乙卯又選各官昧爽由午門入會極門牛金星宋企郊如前唱選預名者令候會極門否則出東華門或令出西華門不解其故蓋東皆回營西皆斬于門外凡七十六人多勦戚丙辰各營拷職官追贓內臣加炮烙尤慘劉宗敏家論官大小勒限贖完日釋之李友等各混拷

銓選吳本無選字

監應

不勒限李友家七十三員選用二十九人聽其自捐夾傷十之四劉養貞再夾惟呼太祖高皇帝追四十三兩又銀杯二又徵之不應曰我寧死也王都等杖斃黨崇雅除通州倉場侍郎來謁李友角巾綠衣諸人就問竟盛額不答中書科舍人吳橋沈某始被拘伴風疾時呼流氓來殺流氓屢受鞭不之拷至四月二十二日同釋四月戊午朔乙丑黃紙傳二十七日即位塘報吳三桂舉兵逼京師戊辰李自成馳偽勅及吳襄手書招之三桂碎其勅擲父書不啟斬從使四人釋回一人自成聞斬使大怒召李友等點兵站隊庚午自成脅東宮二王及吳襄東行步騎也十七萬戊寅吳三桂擊自成大敗



僅四萬騎回京步卒盡沒賊將李肖宇所部萬三千人  
才還騎十七庖人一家丁二云經戰十三年未有如此  
之敗者癸未午刻李自成回京入德勝門從馬約七千  
匹列東華門二十騎自御道入前一賊抱嬰兒不知何  
人也是日故學士楊觀何瑞徵光祿少卿李天經李延  
鼎同鴻臚寺八人勸進自成曰事且亟何登極之有劉  
宗敏厲聲曰已有旨明日登極各官可出料理各官退  
宗敏與自成爭曰爾幾十年辛苦一旦敗壞若不登極  
何以回關中自成默然甲申果僭號先燬太廟主從此  
壞民居運入大內為爨具丁兵外刻賊出阜城門留卒  
七百餘人入大內及各巷縱火高弼高拘李友家被夾

官八人吳本無官字

勒四百金詹事張維機主事蕭鴻基至夾其骨張尚書  
鳳翔前出獄被拘勒四百金不夾

李自成入燕後拘明朝大小各官分營追贓有中書十  
數人同拘繫一室忽傳偽旨是夜俱令自經鑄鎖甚密  
外嚴兵收之各官以次自經氣絕縋斷大半墮地伏尸  
相枕籍蘇州申濟芳獨逡巡不就縊天黎明聞守者啓  
鑰入申急迫伏積屍中詐為死狀一守卒云生死未可  
知當頭人與一棍連棍數人忽一卒云料此輩已無生  
理鞭屍何為遽舍之出午後命各家僮識認尸首負歸  
殯殮申竟得脫後年八十餘卒于家太倉唐實君為余  
說



甲申四月京報絕月餘雷都疑阻十三日有中人夜至  
內府云京師三月十九日已失守明晨張總憲藐山慎  
偕御史周元泰朱國昌郭維經朱壽圖至高司農弘圖  
確齋所少頃確齋及尚書史可法呂侍郎大器姜詹事曰  
廣集議監國首福王或云潞王時並僞淮安高張之意  
屬于洛陽史頗不然之意在衛輝恐北耗未確尚爾遂  
巡俄奏差回自都下云三月十六日西服手菜筐逃出  
京其夕炮聲遠震迨旦寂然餘不知也諸人唯唯各散  
二十二日史尚書以三千騎勤王渡江俾呂侍郎攝禮  
部印越三日史尚書速諸臣往江浦議事侍郎得史手  
札即傳示諸公素服會清議堂謀葺武英殿二十七日

有中人奔南備悉凶問是日告奉先殿姜詹事撰文高  
尚書舉筆云神宗皇帝之第二子第一藩云云而史尚  
書札至意專衛輝尋又札云洛陽衛輝並南下當拈闔  
孝陵之前云云亡何總督鳳陽馬士英書來奉福王發  
淮安將及矣即日守備南京太監韓贊周出迎二十九  
日王舟泊燕子磯明日抵龍江關先召見列侯次尚書  
史可法高和圖程註都御史張慎言同謁舟中王左手  
挈史右手挈高跪泣答之角巾衣葛坐榻上衾枕俱敝  
蚊幃不具五月朔登三山門環城而東謁孝陵自朝陽  
門入經東西華門宿外守備廳四日監國傳諭天下是  
役也南都始議未定馬士英成之史尚書前督鳳陽稔



宏基下吳本有值字

知福世子湛于酒色徐魏公弼基高尚書于皇城下曰  
事亟矣惟賢是立何論序乎史在高郵聞福王舟近即  
列諸臣名啓迎或云士英初意亦不專洛陽與史尚書  
同偶值福王舟擁而南背其始議後謂臣以兵十萬護  
蹕臨江欲駕南都諸公之罪給事中李沾謂告廟文出  
臣筆皆非其寔也

南渡年號閣擬定武弼光拜天探籌得弼光冢宰張藐  
山曰光字上于文為火清朝年號曰治從水水能火奈  
何果如其言

馬士英挾迎駕之功自江北表朝不欲出鎮故事輔臣  
必有入閣辦事之旨士英特繫銜大學士非內任也竟

據政府史相國因自請出鎮鑄督師輔臣之印士英忌  
史聲望遠出已上又史先束士英有福王不忠不孝等  
語士英意脅之史求還故牘終不相忘掣肘陰螫以勞  
勩難泯遂構新建姜相國謂觀望異議與并陷史也  
燕京從逆諸臣雷都傳報不一其最著者鄉人東怨輒  
馳檄殺討茹蘇則有項煜錢位坤宋學顯湯有慶常熟  
則有時敏皆焚毀屋廬尋臺臣嚴禁御史祁彪佳撫安  
蘇松常鎮誅首亂六人乃止

有時敏吳本作首時  
敏

桐城阮大鍼初附東林與嘉善魏忠節爭吏掌科因投  
逆璫歷太常少卿坐黨廢避禍金陵稱詩好客素善內  
臣馬應芳馬士英僑南都時時過從南渡初總憲張藐



馬吳本作馬

山改冢宰奉詔言逆黨案置勿用大鉞計沮噉誠意伯  
劉孔昭拉勳臣廷攻冢宰專右文臣自是冢宰四疏乞  
休士英密薦大鉞言其知兵立除兵部右侍郎召對以  
高相國廷爭臺省交論未拜命而心益急士英令徐俟  
之及涖官每朝罷輒手招士英就語自示于諸紳中日  
同士英輩狎飲後常熟錢侍郎附焉錢寵姬柳如是大  
鉞請見貽以玉帶曰為若覓恩封設孺本云

張藐山冢宰去後誠意伯劉孔昭之權日甚自謀入相  
不得乃荐兵部侍郎德清蔡奕琛南都之禍始于誠意  
潰于馬士英阮大鉞

司禮韓贊周字象雲賢內侍也弘光帝始而憚中而踈

末且厭之嘗盛暑擊球三人交筴不休贊周凝立不動  
十二月西宮成臨御上色不怡贊周請其故上曰無佳  
優人奈何贊周泣曰臣意官家思先帝乃如此抱恨乎  
上常責太監馬永芳爾但知印堂安知我印堂指贊周  
也

黃澍本歙人年少輕侮作葉子格品第宗婦之貌見擯  
于族走杭州冒籍郡庠丙子舉于鄉明年成進士授開  
封推官壬午禦流賊開渠轉粟河水秋溢遂灌汴城禍  
自開渠始又搜民間藏粟併金錢奪之汴人切齒及內  
召烈皇帝面問開渠者誰也委之流賊利口迅舌人莫  
能難以御史按楚未及瓜遽入朝意覲開府廷劾馬士



吳本無納字

英責數其罪，光帝色動云：黃澍言之有理，願高相國記之士英跪階下，惶愧欲死。出因行金結納，內臣張執中等蓋平賊將軍左良玉，唾馬氏故，大言清君側之惡。澍出良玉手書，挾重鎮以劫之。及澍還，按楚士陰遣人購良玉而澍孤矣，尋免其官，畏禍匿。良玉所女歸其子，明年左氏稱兵，犯闕寔澍為之厲階也。

乙酉五月，南都敗，士英出逃，至孝陵，詭飾其母為太后，召守陵黥兵自衛，所遇劫掠一空。從廣德州走安吉，知縣黃翼聖掃衙舍以停偽太后。及士英家眷浙撫張秉貞下檄，安吉問太后真偽，翼聖啓云：閣部既真，恐太后亦非假。張遂備法駕，迎入杭州，偽太后駐朝天門，東李

皇王吳本作皇上

總兵宅士英屯兵湧金門外，王氏園路王菴謁太后，如常禮辭之。已令妃具宴，送入妃躬詣陪侍，復峻辭之日，夕惟與士英後妻及婢數人相處，人始疑其偽。本朝兵將至，士英走台州，魯王監國訪太后，不得會稽熊少卿。汝霖責士英不扈皇王，乃母后之狗乎。士英無以應。戴山劉先生前削籍家居，南渡起左都御史，入京不攜冠服，先馳疏自稱草莽，臣歷指時事之失，內及逃將封爵、貴陽及劉澤清忌之。蓋劉自臨清南遁，謂中其隱，各疏攻先生澤清，疏并列左良玉、黃得功、劉良左、高傑名，請加以重僇，寔各鎮不知也。先生至南京，借冠服赴任，士民鼓舞稱快，群瑞亦曰：劉先生君子也，恐不得久耳。



果即引去

甲申秋南教坊不足克下陳私徵之遠境阮大鍼楊文  
驄馮可宗輩各購進大內嘗演麒麟傳奇劇未終妓人  
首戴金鳳者三蓋宮中例承幸者戴金花以自別也  
甲申九月南都有選宮之命皇太后自于外守備廳擇  
六人未噉命再選初各官必慎其後會于貢院狎笑褻  
視選七十餘人寢及蘇杭太后侍女金花年十八來自  
中州殊色也所選並不逮上待如妃禮明年阮大鍼入  
其宗女雖殊麗完不知誰氏也又書佐周某自獻其女  
太監田成來駐杭州貢院樹黃旗二選五人止王氏雷  
京上之出奔也阮氏周氏王氏命還家

弘光朝雜謠。弘光年要做官非騎馬士即種田太監

射人先射馬士擒賊先擒王紅花開天子來不辦衣

衫只辦鞋。又聯周延儒字玉繩先賜玉後賜繩繩繫

延儒之頸一同狐狗之頭馬士英號瑤草家藏瑤腹藏

草草貫士英之皮遂作太羊之鞞。自成不成福王無

福兩下皆非真主北人用牛星南人用馬士一般俱是

畜生

倪鴻寶先生與同邑丁庶子進俱天啟壬戌進士選庶

常嘗中秋聯句丁首唱云中秋佳節好吟詩為人所晒

上偶閱崩字何義丁曰君死曰崩倪曰先帝升遐曰崩

進自慚漸與倪成隙倪少娶餘姚陳氏失歡後官尚書

漸矣在作愧

人海記

三四



以妾王氏膺封誥丁遂修怨嗾誠意伯劉孔昭許其事  
倪奏辨陳氏失母意遣歸外家命娶王宜封引海瑞前  
妻許氏潘氏弗封封繼妻王氏為例幸上不問倪竟以  
此自免歸陳氏寔同母夫人居非遣歸者甲申末陳氏  
訴于朝時孔昭在事奪王氏改封陳氏  
史相國分立四鎮意在收江北之援卒不得其力先是  
四鎮兵各乞餉六十萬高傑最强悍黃得功劉良佐次  
之劉澤清為極弱史于楊州大會諸將下拜求出師傑  
雖跋扈頗感動遂率眾而北傑至睢州為許定國刺死  
中旨切責之定國畏罪導本朝兵南下  
乙酉三月初九夜嘉興府城內外居民戶上各有圈或

各有圈吳本有字下

有書字

紅或白或書上或書日或斜書雙曉起驚異不知所自  
至閏六月羅兵燹惟白圈白書之家不火徐敬可云  
楊文驄字龍友貴州舉人不第宰青田後量移江寧癸  
未蕪湖兵擾西征自效事平仍返縣任張藐山改都御  
史疏劾文驄榜其文不令視事明年夏馬士英入相文  
驄以甥婿起鎮江推官未行擢職方主事尋監軍鎮江  
明年五月拜巡撫僉都御史一日遽南遁時總兵鄭彩  
方陳列江上聞之兵立潰弘光聞報即出奔迨曉馬士  
英亦逃南國亡  
弘光即位語輔臣以先後妻妃三時方訪母后于中州  
未及宮眷御史陳潛夫按河南以童氏至有司護送入



京年殆三旬坐詐冒下錦衣衛獄童氏從獄中上書云  
某年月日娶我某年月日陛下出亡所衣某色所飯何  
品所出何地又首帕妾所加也云云此書不知緹帥馮  
可宗作何狀獄上後傳聖諭有與潛夫同卧起之語絲  
縑之地豈應污褻若此耶聞澤清婦劉氏上馬士英夫  
人書救童氏

乙酉六日本朝兵至杭州潞王常澆張秉貞以城降而  
浙風靡總兵王之仁守定海上其印都督方國安自杭  
走金華與朱尚書大典合兵尚書以方兵剽詐不許遂  
相持會山陰大學鄭遵謙倡義兵熊少卿汝霖孫職方  
嘉績應之寧波則刑部員外郎錢肅樂浙東響集迎魯

王于台州西築土城守江國安東下富陽下分屯金村  
嶺朱橋其屯朱橋則國安兄子元振也號土漢營大總  
兵萬餘船五百餘沿朱橋列柵至轉塘口或說之曰山  
路莫要于西溪而橫山大嶺抱其衝旁多間道叢竹可  
伏兵從此距營二里為清風亭以千人據之且西接五  
雲天竺可俯瞰杭城益張疑兵連合江東縱復不利豈  
能越險薄我營哉元科不以為然元科亦國安兄子戎  
營三總也照吳本作旗營總也八月元科以三千騎直趨六和塔明日戰  
于清風亭江東兵莫敢登岬越三日本朝兵自六和塔  
來攻國安浮江身督戰自晨及晡國安失利本朝兵覘  
橫山清風亭俱無伏九月既望以八百騎自清風亭五

營三總也照吳本作旗營總也

作之



百騎自橫山夜去營一里乘勢奪橋逼寨門守兵皆走元科手斬數人嬰柵力戰本朝兵登廟山望柵中白牆不相屬遽發砲墻傾大呼馳入方兵大潰僅得及舟而遁遂焚其柵自是國安不能復渡江丙戌五月征南大將軍貝勒李羅至西興荆國公將走台州馬士英以許封西平王勸國安降遂解甲後與元振俱被殺馬士英奔紹興辨臣非悞國又挾方國安為重命戴罪圖功丙戌六月朔首逃

金正希先生倡義於休寧同縣令何通武遣諸生朱倫迎黃澍于江寔不知澍已通款本朝也九月本朝帥張天祿畧地且至戰失利先生與歙縣諸生江天乙同被

執見洪承疇不屈遇害僧某殯之題曰赤壁金公柩扶至蕪湖閩商某薄其棺改殯焉

徐冢亭虞求原名文治本禾郡諸生萬曆庚子斥場屋赴南闈舉第一被攻走江楚殆二十年青浦令其受業生也遂補諸生舉于鄉天啟壬戌成進士歷官介潔屢起屢忤己酉閏六月二十六日本朝兵下嘉興先一夕公入城聞敗自經于故第精嚴寺僧真寶殯以米因袖有詩扇蒼頭祖敏殉其旁先生有別墅在賀家橋南其孫顯武與予善時時過話前事所著名可經堂集錢唐大遮山東明寺相傳建文曾避跡于此本朝順治丙戌某月某日有二十二人皆偉幹傑貌免胄而入命



荆吳本作黑

有挽鞭吳本少有字  
連之吳本連字下少之  
字

守僧以米三斗作飯豆一斗作乳倉卒具食僧異之問  
飽未曰未也亦不敢飽飯後徧視佛像不拜見建文像  
則拜而下泣一人在前餘隨後不敢並已而求浴裏衣  
朱殷膚如剝漆人臂二弓腰一銃試鳥雀不一失鎧仗  
重鐵度所負荷皆餘斤其一人泣拜者有挽鞭重數十  
斤合二僧之力僅能舉而彼連之如棕拂竹如意問邑  
里姓氏不答聞其聲知為北人也問今何往則泪隱  
承睫曰吾糗盡遊觀天下無可起事者吾安之乎曰三  
吳足賦可就也曰取三吳未能集事僧曰以諸公之敢  
力赴義何患無成默不應諷之若空亦不應僧曰即出  
值官兵奈何曰吾仗劍行數千里先後所值何啻百千

諷之若空一作諷之  
若空

經山吳本作徑山

彼烏能難我僧曰自此天目民寨殆百餘所稱義師能  
往觀乎曰曾按視一二所皆盜耳不足目也因問道僧  
述天目經山湖州之程曰吾之湖州曰湖州多守兵曰  
固欲遇守遂曹而去每一人曹西人力收之目欲迸火  
尋聞其遇守兵殺五百餘人而二十二人無恙愴然嘆  
曰吾多殺亦何益且吾所以來豈為此輩哉皆投碧浪  
湖死外舅陸辛齋述寺僧指月之語

洪武三年庚戌五月始詔行科舉直隸貢百人河南山  
東山西陝西北平浙江福建江西湖廣各五十人廣  
東廣西各二十五人時真隸就試者百三十二人拔七  
十二人見考官宋潛溪鄉闈紀錄序試錄曰小錄按登

一本...

人海已



科考無錫俞憲所輯中載在京鄉試直隸府州一百名  
河南山東山西陝西北平浙江福建江西湖廣廣東各  
四十名廣西二十五名與潛溪集徵有不同又按登科  
考洪武三年庚戌鄉試四年辛亥會試以後至十七年  
甲子始復行鄉試而金華府志有庚戌辛亥壬子癸丑  
連歲開科之語紹興府志云六年金鑄榜不知何所出  
雲南開科始永樂九年辛卯時貴州尚未附宣德四年  
雲南貴州始合試共取十一人後漸增至嘉靖十四年  
分定雲南舉四十人貴州舉二十四人  
府歲貢二人縣歲貢一人洪武十五年定嘉靖十年令  
天下歲貢五人選其一歲貢通學考選至十五年止天

啟元年鄉試一榜廩生准貢崇正元年戊辰以登極始  
有恩貢乙亥通考各學廩生拔貢一人己卯鄉試一榜  
俱充貢不論增附

永樂二年己選庶吉士矣而戶部辦事進士當塗李衡  
以年少自請命改庶吉士同江寧楊寧習書至宣德八  
年三月己選庶吉士十一月又選前科進士能文者徐  
瑄等十三人為庶吉士命學士王直教習此教習之始也

舊例貢士三科不第禁會試弘治三年始弛此禁  
弘治壬戌科選庶吉士并修撰康海編修孫清李廷相俱  
課書學士梁儲王華教習先是天順四年選庶吉士劉



健等十五人并修撰王一夔編修李永通鄭環命學士  
劉定之侍讀錢溥教習此外鼎甲不在館課之列萬  
歷壬辰後選館概課而鼎甲不出序今與庶常一例論  
先後矣

正德甲子四川解元周洪謨丁卯福建解元陳俊第一  
場俱五義

嘉靖初會場禮部條約許舉子帶洪武正韻一部表末  
不用瞻天仰聖見董穀碧里雜存

科場舊規正主考閱易書二經副主考閱詩禮春秋三  
經各不相涉詞林典故

李九我舉鄉試第一申少師瑤泉即留為館賓轉館于

歸安董宗伯家癸未李得會元申正當國廷試時文定  
以子用懋入試避讀卷是科秀水朱文恪公一甲第一  
李在第二賜第後九我見秀水頗快快一日秀水疾李  
過候坐榻傍推意見庭松蟠屈笑曰弟嘗夢歷此景或  
云功名在是今得之矣名次兄後非豫北耶自後款洽  
無間

殿試策進呈必取書法整齊無舛譌者隆慶戊辰科閣  
臣擬進上疑首卷有私于二甲卷首得羅萬化真第一  
其卷字多塗抹者

各省鄉試專遣京官始於萬歷乙酉舊主副俱教職由  
監察御史所聘布政使提調按察使監試彌封謄錄受



卷皆有司例得閱墨卷有所識拔內簾無敢違者自專  
差朝臣內外簾始隔絕

典試差部主事始于萬歷甲午禮部推湖廣主試翰林  
院某吏科左給事葉繼美上點葉另用工部主事莊懋  
華

韓求仲先生師事湯宣城萬歷庚戌湯分房搜隣房拔  
韓養會元時方忌湯遂并攻韓竟免官終身不達

鄉場監試例巡按御史或偶缺則代以巡監萬歷乙卯  
貴州巡撫張鶴鳴代置監試此巡撫監場之始也

萬歷丙辰會元吳江沈同和文倩第六名趙鳴陽作事  
發二人俱褫草京師以戲謂斷么絕六

口天本力字上少葉二

天啟壬戌會試閣推何宗彥願秉謙主禮闈上點宗彥

忽及朱養純願疑秀水有他故頗不懌後秀水捐館顧

擬謚文懿朱公子力爭得謚文恪廷試策偶悞筆以塗

注不便例多任之萬歷己未科狀元莊際昌醜悞膠崇

正辛未狀元陳于泰陽悞易榜眼吳偉業曠悞驢

殿試進呈惟會元另封此明朝舊例也今不然

明朝宗室進士天啟崇正兩朝共十一釋褐後例補輔

國中尉惟戊辰科新建朱統錦選庶吉士改中書舍人

復入館歷國子祭酒

萬歷甲辰進士同姓名者張銓一大名人一心水人俱

乙亥正月二十六日生科第子女皆同

每已

里



莆田科甲最盛宋時進士九百七十餘人諸科特奏名六百四十餘人大魁五人宰輔六人明朝自洪武庚戌至嘉靖戊子凡五十二科中鄉舉一千一百十一人進士三百二十四人狀元二人探花四人會元一人解元二十五人

鄉報急足始於嘉靖中其時舉子尚自備青袍後官給不知所自

選歷科程墨自萬歷庚辰錢唐人錢穀字豐寰始錢貢生官終曲請知府會試同門房判始萬歷壬辰

明朝故事御批一甲三人卷用玉管筆拆卷在中極殿左

西京鄉試及會試錄序皆稱臣外省則否以考官所自序也萬歷初上摘此以問閣臣欲罪之江陵具言其故乃止其後各省錄序皆稱臣

兗州滋陽縣儒學祀復聖顏子之神與天下不同陋巷志

土木之難李襄敏秉從征脫歸進戶部主事夜夢作詩

送楊鴻臚迎駕其詩曰天恩寵渥作鹽梅迎復君王出

紫臺群虜潛蹤歸朔漠六龍回駕入蓬萊明日以語同

官明年事驗

御史出巡舊騎馬後乘輿不知起于何時當是成化以後事浙江有舉子王化大帽見按臺某按呵之間所從起對曰即起于大人乘轎之年



丁一作弓

吳縣朱良育積學不第膺歲貢子鴻成進士官主事馳封不受竟明經沒

鄞縣余相國文有丁父永麟幼喪父育于小江里余氏後鄉舉歷蘇州通判生文敏既貴當贈三代不知所自出不得已贈永麟所後父愾及愾父鏜而命子孫家祭則蘇州公始。文敏少從其父官蘇州慕崑山歸有光名將師之不果嘉靖乙丑文敏以編修分闈拔有光第

二 戚少保 繼光 鎮薊門駐三屯營最久經畫周詳歿後有祠總兵尤繼先到任不拜祠除夕公庫突獨題梁及銀牌存題梁年月少保所書繼先嘆戚公神人也刑牲以

### 祭

上海唐抑所文獻先生謚文恪易名之典仍犯其名何也宜如陳莊靖文之例易之

嘉善錢龍門初入翰林崇仁吳相國文定道南語之曰若初到衙門須記三事不擬試題不受門生不出遊庶保名節

嘉善丁清惠公與烏程朱平涵相國相楨善謂其居台鼎猶秀才氣象

明初朝鮮國王獻顏子以偽書却之按古偽書不一而足如毛漸偽三墳張昇偽元命苞孫定偽關尹子阮逸偽元經宋咸偽孔叢子戴師愈偽麻衣子袁康偽吳越



春秋明崑山王逢年偽天祿閣外史海盜姚士舜偽於陵子皆不湍識者一噓也

萬曆六年河南李蔭宰宛平構小齋發礎得唐李邕雲麾將軍碑云碑石蕪沒良鄉驛舍裂為礎柱蔭輦邑署名其齋為古墨可辨者百八十九字首篆存唐故雲三字

宋學士潛溪前後集元季已盛行於世入明朝劉伯溫選定為文粹十卷門人方孝孺鄭濟等又選續文粹十卷皆方孝孺與同門劉綱林靜棲連手自繕寫刊于義門書塾常熟錢牧齋宗伯曾於內閣見之方孝孺姓名皆用墨塗之蓋遵草除舊禁也

宋學士潛溪吳本作  
宋潛溪學士吳本

鄭所南心史崇禎戊寅十一月八日蘇州承天寺君慧上人浚督井得鐵函重櫝外標大宋鐵函經內書大宋孤臣鄭思肖百頓首封自元世祖癸未歷三百五十六年其書始見於世其精氣自不可磨沒也朱竹垞云此是偽托不知何據

李空同刻淵明集盡去評註曰青黃者木災太美之味豈群口所嚼哉

江都葛澗子常好積書撰國朝人物編自洪武迄嘉靖數百卷人為列傳甚悉年七十餘卒友人私謚為正學先生今其書不可得見

王元美所著讀書後四本捐館後公子吏部士騏于貨



云吳本作之字

糜一作糜

郎擔中重得刺以行世又有毀論十手係先生手書無  
副本牧齋宗伯乞於吏部秘不示人辛卯九月燔于絳  
雲樓云一炬惜哉

新建張洪陽位司業刊二十一史于北雍糜工部六萬  
金有奇見李湘州集

濮州李尚寶先若選明朝燕趙秦晉齊魯河洛淮揚藩  
邸之詩附以蜀曰明雋吳越荆楚不與焉東河一作于  
文定序曰自二南以下十五國風皆江以北地也降而  
春秋吳越之歌吟乃出降而戰國荆楚之騷賦始傳故  
江以南之韻則歌吟騷賦之流而風之餘非始音也原  
音之始以北先也

吳本餘字下有也

吳本餘字下有也

南充陳文憲于當國時修正史列聖本紀皇后本紀建  
文景泰以實錄附載而不作紀郊祀廟祀典禮樂律天  
文歷法宗藩學校選舉職官經籍賦役貨幣漕運河渠  
鹽法軍制馬政刑法郡國九邊凡二十二志楊徐滁陽  
三王高祖之十七藩成祖之二藩仁宗英宗各四藩憲  
宗之三藩外戚洪武之功臣諸臣建文諸臣永樂之功臣諸臣洪  
宣諸臣正統天順景泰諸臣成化弘治諸臣正德諸臣  
嘉靖諸臣隆慶諸臣又理學文苑循吏高逸孝節亂逆  
權幸方技四夷列傳二十六紀志粗畢擬草列傳丁酉  
六月三殿灾輟業南元卒四明沈相國殊不以為意非  
其始議也書竟不成



西泠社事起萬歷丙戌八月時歛縣汪伯玉鄞縣屠長  
御輩集西湖之淨慈寺地主則仁和卓明御餘杭徐桂  
杭州布衣陳植之業醫苦吟好學其五言佳句如疎鐘  
四壁靜微雨一燈明移花春徑雨看竹午窓風絕似中  
唐風格惜全章散佚不傳周青士所記尚多偶錄此  
洪武開國事略本湖廣行都司經歷蔡于壁之龍飛記  
畧卓氏藻林本吳興王氏所輯嘉靖以來諸公掠美者  
頗多

藏書之厄如浦江鄭氏八萬卷燬于火義烏虞守愚侍  
郎德燁叅政父子築樓藏書萬卷署曰樓不延客書不  
借人後蘭溪胡孝廉應麟賤直得之隨亦散佚太倉王

御吳本作郎

弇州書最富再傳而失開封中尉睦樗之萬卷堂會稽  
鈕氏之萬卷樓吾鄉祝侍郎耳劉之萬古樓武原駱侍  
御駸曾平湖馮孝廉茂遠常熟錢宗伯牧齋非流散則  
灰燼矣楊循吉既老散書與親故云今蕩子鬻婦無復  
着手亦一道也

錢牧齋撰明史共二百五十卷辛卯九月晦甫畢越後  
日絳雲樓火作見朱衣人無數出入烟燭中隻字不存  
黃石齋先生著孝經集傳又奉命纂洪範明義四卷戊  
寅謫官即進呈云臣考篇中有錯簡者三訛字者三錯  
簡如五紀三德敷言錯而在後域福建極敷言錯而在  
前訛字如晨為農式為忒殛為極之類皆伏生一作之



所不稽鄭紀一作孔之所未說宋元諸儒稍發其端明興諸儒未竟厥緒云云

崇禎癸未楚撫宋一鶴敗沒妾金陵陳氏色藝兩絕為門客王屋所聘貴陽謝參政上選先娶致訟新安程奎戲作絕句歌舞叢中度歲華一朝忽散抱琵琶前身定是烏衣燕不在王家即謝家

長泰盧岐嶷嘉靖甲辰進士終貴州按察使初為戶部郎與汪道昆同舍時有餽汪脂香油皂者汪徵故寔盧曰唐人謝賜口脂豆澡此二物也宴席有獅糖汪復問于古云何盧曰漢光武禁猊糖不許高大此是已李空同作文凡地名官銜俱因時制不用古名

江陰李戒菴漫筆先世分關中寫吳原年洪武原年俱不用元字想國初惡勝國之號故民間相習如此按元字避御諱元章戒菴悞矣

陳友諒後裔為沔陽柯氏馬氏與部曲設王吳三家浦居興國大冶瑞昌界中張士誠後裔為章邱李氏初敗時乳母攜幼子而逃冒李姓

鉄券分三等國公式二其高一尺有六寸次高九寸五分博尺有六寸侯式三其一高九博尺有五寸次高八寸博同上又次高八寸博尺有四寸五分伯式二其一高七寸五分博尺有三寸五寸次高六寸五分博尺有二寸五分



戚吳本作業

明制文臣官銜支俸勲戚官銜不支俸  
外國詔勅事竣使臣上其筒禮部轉繳內府不得損壞  
御史聽選聽察首浙江道內計掌察則河南道蓋明初  
首下浙江先設宮洪武元年詔開封為北京示重也名  
勝志云北宋以河南為京畿道故宮宇記首列河南南  
宋以臨安為京畿道故紀勝要覽首列浙江明朝蓋兩  
沿宋制此說非也

凡占籍者自軍匠民灶商外有儒籍官籍御醫籍先賢  
籍正德庚辰吾宗常熟派亨隆公應兆以御醫籍登第  
崇禎丁丑進士四川某齒錄書儒籍以祖父三世皆教  
職也

洪武十四年二月建太學自孔子以下皆撤像設神位  
外學仍如舊至嘉靖九年天下學宮始撤像易主  
征南將軍印沐氏鎮雲南世佩之其印不全用量事大  
小或用一角或半角蠻人奉如尺一  
南京洪武朝陽太平三門禁出樞魏國公家葬鍾山許  
太平門倒出

從來棺柩止有出城者故旅櫬還鄉率停于墓田康熙  
乙丑崇明相國宋文恪薨于京師奉旨馳騎差官送歸  
公子扶柩入蘇州府城里第治喪此變例也  
宋景瀛先生以洪武十四年辛酉卒於貶所葬夔州蓮  
花峰下越三十三年永樂癸巳十二月二十七日蜀獻

吳本作業

海已

尺



養一作陽

王遷葬于成都之華陽安養鄉又七十二年成化乙巳十二月十三日蜀惠王改葬錦城迎暉門外

明初文臣多不得封贈贈父母及妻始於永樂十年然其時亦僅八人西楊勒石以垂後

二月八日吳本作二月

京師省設提學憲臣始正統元年五月命於二月八日

兼督民間裁種桑棗先是守令提調諸生五月試經義

仲月論表季月策皆在學舍今之觀風季試其遺制也

明朝太宗伯不從翰林出身者凡三人錢唐楊寧正統己巳

遂寧席書嘉靖甲申嘉定徐學謨萬曆庚辰雖起署漕然皆進士

出身向例禮部堂屬未有用孝廉者康熙壬辰吾邑陳

實齋說由司空調宗伯一時以為盛事陳壬子乙榜也

景皇帝園不稱陵在金山上距西山來十里陵前坎陷

樹多白楊及椿合三四人抱高可二十丈

建文帝葬處距景帝園不遠石碑題曰天下大法師之

墓按楊士聰玉堂薈記駙馬都尉鞏永固請追謚稱皇

帝上語輔臣曰建文無墓何憑追復尊號惜當時無據

此以對者

景泰以前漕船無定數天順後定船一萬一千七百七

十五隻官軍十二萬一千五百餘員名至崇禎中額船

一萬二千一百四十三隻米四百萬石每舟正米三百

三十石每百石加耗米九石八斗又月糧四十金行糧

十六金。浙江舊額二千四十六隻糧四十萬石。江



南舊額各衛共四千四百五十九隻俱清江浦提舉司所造

南京貢船共一百六十六隻龍衣船不與焉又兵部馬快船六百隻俱供進貢

明朝民運白糧惟蘇州松江常州嘉興湖州五府有之共船五百六十七隻

成化間松江人以布餉貴近流聞禁廷下司府織造赭黃大紅真紫等色龍鳳斗牛麒麟等紋工作胥吏因緣為奸一匹有貴白金百兩者孝宗在東宮深知其弊即位首罷之常閱內帑見之曰此布一疋文綺十匹價也終身不一御自是遂絕

松江細布歲輸京十二萬三千八百六十疋華亭六萬五千一百疋有奇上海四萬二千七百二十疋有奇青浦二萬三千四十疋有奇萬歷初加八千匹

弘治十一年大學士謝遷言臣祖榮任福建布政司都事例不得封乞以已得誥命移贈上並予之天啟初太子太保吏部尚書張問達言臣父某任四川眉州判官坐劾奪職臣今雖縣復冠帶不得封今乞恩命許之閣閣臣賜蟒服始弘治十五年十二月乙巳

北京宮殿遇灾凡九永樂辛丑四月庚子三殿灾壬寅閏十二月戊寅乾清宮灾弘治戊午十月甲戌清寧宮灾正德甲戌正月庚辰乾清宮灾嘉靖辛丑四月辛酉

十三  
三  
吳  
李  
清  
吳

人  
每  
已



乾清下本無坤寧  
二字

九廟災丁巳四月丙申三殿及文武樓奉天左順右順  
午門災辛酉十一月辛亥萬壽宮災萬曆丙申三月乙  
亥乾清坤寧宮災丁酉六月戊寅三殿災

嘉靖時祖宗御容藏永孝景神三殿

嘉靖癸丑暹羅國貢白象道斃使者以珠寶飾牙置金  
盤中并獻象尾

秀水朱文恪公萬曆癸未進士第一臚傳日文恪公父  
太醫院使東山緋服侍班○乙未以修撰朱國祚為司  
經局洗馬故事鼎元無任洗馬者八月充皇太子侍班  
尋清理貼黃靖難功臣舊署奉天征討文恪曰文皇不  
得已值此奈何以同姓加征討名悉改靖難

吳本討字下無名字

戴從吳本

並老屋產也吳本作  
並世產也

每年十一月朔傳戴煖耳百官傳衣不謝煖耳獨謝  
韓城薛相國國觀不良坐贓五萬籍其家財六白金所  
居廳事三間共室四進並老屋產也唯好使氣故鄉人  
不附朱右君述霍魯齋語

燈市舊在內城東華門外今移正陽門外靈佑宮傍至  
期結蓆舍懸燈高下聽遊人畫觀蓋京師坊巷元夕不  
放燈也

大內牡丹盛開神廟思以磁瓶貯之偶江陰民有一均  
州瓶高數尺許欲得十金或笑之忽內官覓進上喜問  
價幾何奏曰二百金上諭先給百金如未肯再給五十  
金



神宗侍皇太后最恭篤萬歷丙戌梓宮殯殿產蓮花九枝故後稱九蓮菩薩閣臣申時行許國王錫爵皆有瑞蓮賦

朔初武職多拔於勲胄後乃開保舉將材之例往循名而不責寔華容劉忠宣為大司空始議行武舉疏請倣唐宋故事每遇文舉鄉試之年亦將武舉預期行移各省試可取者送兵部會萃數日請於次年四月開科初較騎射以發十矢中三矢以上者為合式次較步射發九矢中三矢以上者為合式三試策二道論一篇後者列職推授若非全材則斥而不用元張中丞養浩歸田類稿有登懋忠閣詩自注云北三

十里為大內虞文靖集作楊襄敏碑云至元某年始大城京師于大興故城之北中為天子之宮廟社朝市各以其位而貴戚功名臣悉受分入以為第宅然則元之大內在今地壇之右矣當時樵李頌淵白獻燕都賦寧海李侑孫有大都賦惜皆佚不傳也

興隆寺有八景如正間都下諸公賦詩成卷馬東田和之復為跋尾今詢之寺僧罕有知者  
北方山藥產于采育者為天下最嘗於朱竹垞檢討席間食之真瓊糜也

宣德紙有貢箋有綿料邊有宣德五年造素馨紙印又有白箋洒金箋五色粉箋金花五色箋五色大簾紙磁



青紙以陳青款為第一

大房山僧多植牡丹其色有大紅淺綠二種絕奇

元方輿勝覽大興府載佛寺三十八區中有海雲寺元

時有千葉杏二株名芙蓉杏傳巖起在京師築清晏堂

以此花置瓶中錢唐張升夏見之稱其奇麗可觀江南

所無巖起索叔夏賦之為填三姝媚詞海雲寺今失其

處故老茂有知之者

出阜城門西行三里許有報恩寺又西三里為靈佑觀

又西為廣福寺又西為嘉祥觀又西為元應觀八里

莊堡為摩訶菴又西為永慶寺又西為慈壽寺又西為

元福宮嘉祥觀多松入門二株尤秀潤摩訶前殿有碑

案一作採

二碑文左為鉛山費尚書案撰右為華亭孫尚書承恩

撰俱嘉靖二十七年立殿後右廂有竹一叢院中雜蒔

草花堂懸萬物育二字墨跡上用恭穆獻皇帝睿筆壘

壘下有嘉靖年製小印堂後松二株高出殿脊其後中

官趙政墓也元福宮建于正德五年至天啟五年重修

中有蒼松四最奇古後殿三清六真像皆范銅為之配

殿文昌與夾侍童子亦銅像旁鑄一騾書銅質光潤絕

似宣德蓋金燠爐色殿前後凡四碑一仆二為人磨去

止存中書舍人表志學一碑崇正元年所立也  
興勝寺去摩訶菴二里許土人目為松林今松無復存  
者萬歷中所建後有藏經閣可眺西山東北有果園園

吳本  
吳本  
吳本

人  
已

三



中有亭曰衆芳亭北砌石為流觴曲水其東有閣曰明遠春月桃李雜發登閣望之不異錦城花海也

阮大鍼降時本朝兵方下浙東儼然以福建巡撫為掌握中物隨征南行至仙霞關暴死其僕下嶺求棺不得時天氣炎熱三日後乃得門扉一扇募土人舁下山則尸骸悉潰爛蟲出矣草、薄殮不知埋骨何地無子絕祀

馬士英自南都逸至紹興府入方國安營既而阮大鍼亦至本朝兵渡江士英國安走台州大鍼迎降錄用降官奉有阮大鍼投誠獨早之旨以軍前內院隨征急招士英及方逢年方國安等出降時唐王改元于延平士

英心懷首鼠密表通軍中消息及本朝兵下仙霞關唐王倉卒出奔書損委棄道路貝勒于亂籍中得士英表大怒以洩漏軍機與一方同日處斬懸其首于野渡灘而去時錢西頑先生在福建親見之

南渡立國有三疑案甲申十二月有僧大悲蹤跡頗異在石城門為邏者所執詔府部科道法司會審據供稱先帝時封齊王以崇禎十五年渡江其語似顛似狂詞連申紹芳錢謙益于是阮大鍼楊維垣等令張孫振窮治之欲借此以羅織清流造為十八羅漢五十三叅之名如徐石麒徐沂陳子龍祁彪佳等東林復社計一網盡之孫振審詞云大悲本是神棍故作風顛主使寔煩



有徒陰提線索語多挑激上怒而上意不欲深究御史  
高允茲上疏解之申錢各具疏辨馬士英遂不窮其事  
以弘光二年三月棄大悲于市時又有童妃及北來太  
子二案真偽莫辨上初封德昌郡王娶黃氏早薨繼李  
氏再繼童氏封王妃生子不育洛陽陷逃民間與王相  
失太妃及童氏各依人自活太妃之南也巡按御史陳  
潛夫奏妃故在上不問至是自詣巡撫越其杰所具陳  
本末廣昌伯劉良佐以儀衛送至都上大愠下鎮撫拷  
問妃在獄細書入宮月日及相離情事云以某月某日  
陷爭出宮妾具饌奉帕裹上頭踰墻而逃求馮可宗為  
之轉達上棄去勿視命屈尚忠加酷刑妃號呼詛罵尋

瘦死獄中或云在獄未死南京陷不知所之有言童氏  
周府宮人逃亂至蔚氏遇上旅邸相依生一子已六歲  
上南奔各不相顧氏遂委身民間馬士英勸上迎入宮  
不聽劉良佐奏童氏寔非假冒懇賜曲全上諭童氏妖  
婦冒朕結髮宮闈風化所關豈容闖入法司即示情節  
以息群疑覽上諭但斥其冒結髮則為繼妃無疑馬士  
英據外訛傳謂逆旅生子已六歲勸上迎致此語太妄  
不思洛陽之陷在崇禎十四年辛巳正月距甲申纔四  
年安得有六歲子哉宜上之不聽也至大悲事跡始終  
不明既入獄受當事意旨不得不托瘋顛意其招辭必  
有駭聽之語故意誅之以安反側耳不然阮大鍼方欲

闌字余疑之宜作  
濫入

年字下吳本有耳  
字



其字下吳本有中字

快心于東林豈紹芳譙益一辨疏可免士英何所畏忌  
勸令中止上意復何顧惜不欲深究其顛末朝臣固不  
能知也初福世子歿德昌郡王以次當立士英撫鳳陽  
時有以居民藏王印首者取視則福王印也詢其人云  
有負博進者持以質錢士英因物色之上與士英初不  
相識但據王印所在以為真世子甲申國變後南都方  
議所立士英據從外擁戴福王以為己功大悲者或云  
齊庶宗士英之不肯或窮治或止知德昌之當為福世  
子猶未能寔信上之果為德昌也上之不欲深究亦在  
自知之明耶童妃但知德昌即位故詣闕求見而不知  
今日之德昌非昔日之德昌也大悲但知福王世子應

屬德昌而不知上之業已為德昌也童氏既下獄自言  
失身之婦無敢復生非望但求一覩天顏歸死掖廷夫  
童氏陳情愈切則天顏愈遠何不求見太妃召入殿  
面訊之也童氏既不容見則大悲之死固其所矣○烈  
皇帝殉國或傳太子匿太監曹化淳家為嘉定侯周某  
出首或云被脅東出薨于三河所傳不一如光改元有  
少年至雷都自稱故太子也時馬士英未敢決以為偽  
但設三疑端以迎合上意而首斥其偽者王鐸也鐸不  
過欲效雋不疑以自附通經足用者耳至於方拱乾辨  
認面質其偽反滋人疑拱乾是時方從北來掛名從賊  
之案待命吳門一旦召之入都還其原官許其滿雪有



者字下吳本無呼字

不奉馬阮之意旨者乎拱乾舊為太子講官考東宮出閣去乙酉無幾時豈有少年于眾中望見拱乾即指彼髯者呼為方先生而東宮面貌拱乾反不識耶果其偽也一見立辨即宜叱下如雋不疑叱收偽衛太子事豈不直捷乃漫不置一語頷以講讀時瑣事為問蓋當時講官止拱乾一人在列旁無一人為之証佐即少年所答盡是拱乾盡以為非誰從質耶及再審時置禁城圖于前指宮殿名目及帝后所御居無一差謬士英初令大璫盧九德及舊東宮內臣于城外僻處以荒帝其定二王庚甲及宮廷制度詰之無不熟悉于是鞫問計窮楊維垣乃颺言于朝曰駙馬都尉王昺姪孫王之明

案吳本作党

河吳本作何

貌類太子固悉宮中事士英以其言入奏從此遂稱為王之明維垣以逆案廢錮十七餘年宮闈親密何由知悉而此說獨出于其口聞維垣颺言時亦祇係揣摩之詞後遂遽為定案時江督袁繼咸楚撫何騰蛟皆有疏力爭上雖曉喻再三人不見信也本朝兵下南都豫王命少年坐聖豆安上攜以此去不知存亡○桐城錢飲光熟于南都後事余嘗詢之先生云大悲本末不可知而決為中州之郡王也童妃出身不可考而決為德昌之故妃也少年之為東宮不可信而信其決非王之明也先生有傳疑詩三首載田間集中

廷杖之制最損國體然成化間言官受杖者許用綿紙



衣蓋其下體故杖而不傷其膚第撻之于朝而已不欲死之也自正德時劉瑾用事始去衣自後受杖者多不免矣弘治以前詔獄之旨惟叛逆妖言強盜則云好生打着問喇虎殺人則云打着問其餘常犯送鎮撫司問鎮撫奏送法司議罪中間情罪重者始有來說之旨部寺覆奏始有降調之旨至嘉靖中一概打問無復低昂林貞肅公後致仕後曾建白此事世廟下其章所司竟不行當時首被其禍者先京兆也

劉文靖健以程篁墩敏政短其不能詩銜之讓成廷翰之獄李文達賢嘆葉文莊盛也亦以疵其詩文之故二公賢相也其器量狹小乃爾

賢字下吳本有之字

顧東江楹帖云才美如周公旦著不得半點驕事親若曾子輿纔成得一個可

宋朝舊制殿試皆有點落臨時取旨或三人取一或二人取一或三人取二故有累經省試取中屢見擯于殿試者張元遂以積忽降元昊為中國之患于是群臣建議歸罪于殿試斥落嘉祐二年三月辛巳詔進士與殿試皆不斥黜落迄今永為定例

群吳本作廷

相傳明制自翰林出身始謚為文細考之亦不盡然曾

榮襄榮馬襄敏愉俱廷試第一入內翰而不謚文魏文

靖驥吳文恪訥葉文盛邠文敏濟儲文懿瓘印文莊

寶楊文恪廉姚文敏夔王文莊鴻儒何文肅喬新非翰

人每已

矣



林而皆得謚文此例當定于隆萬以後

明初文臣無謚劉文成墓宋文憲漁宋文恪訥朱文恪

善咸請之康陵王忠文禔請之裕陵姚廣孝之謚恭靖

胡廣之謚文穆則自永樂年始

李林甫之奸竟得善終乃於身後屢被天譴元和中惠

州一娼震死朱書其脇曰李林甫宋紹興中漢陽蔡氏

女被雷震死亦有文曰唐相李林甫明洪武間吳山陸

允誠家烹鷄背有李林甫三字宛然蓋已墮畜生道矣

見續問奇類林

粵西七星巖洞壁上舊刻元祐黨籍姓名明弘正間有

欲琢去者時巡按某公謂不若畱示千古至今尚存

康熙二十年御書清慎勤三字徧賜中外衙門按呂舍

人官箴當官之法有三曰清曰慎曰勤其道出王隱晉

書又李康答司馬文正之問有官長當慎當清當勤修

此三者何患不治云云

正德間朝議欲起三原王端毅公恕汝南強景明寄詩

云八十耆年二品官歸來清節雪霜寒雖然海內歸心

在無奈君前下拜難鷗鷺恐疑威鳳起風雲長護老龍

蟠三公事業三槐傳畱取完名久遠看公得詩竟不起

又李文正陽當國日久有士人投詩云才名直與斗山

齊伴食中書日已西回首湘江春草綠鷓鴣啼罷子規

啼公得詩一笑而已



弘治朝張少恭子醇孟繼嘗言作人須有要趣對俗人嗒焉  
一語遇學士大夫有道術者與之談說名理揚摧風雅  
娓娓不倦令人洒然不能遽別一時前輩如西涯相國  
蒲汀尚書皆海內重望每望聯輿過訪張或留坐所共  
脫粟之飯間出蔬果杯酒三五巡即止諸老自公第出  
輒相謂曰吾儕遇張子醇一飯勝別家盛筵矣  
正德中韓尚書文欲攻劉瑾屬李夢陽具奏草謂之曰  
毋文：覽勿省也毋多：覽勿竟也此言極中入告之  
款

建文二年廷試擢王艮狀元嫌其貌寢抑置第二而以胡  
廣易之及靖難師至金陵廣與翰林周公是修克期約

同死周既自經胡負約與金幼孜解縉等迎降良後竟  
死節若廣所謂有媿科名者也

明末華亭有娶婦棄其孤兒再嫁富室又生一子及  
死也前夫之子爭葬之質之縣令縣令判其尾曰生前  
再醮已無戀子之心死後歸墳難見先夫之面

先京兆公在諫垣以糾分宜謫官分宜敗後起官歷文  
選正郎在吏部凡三掌大計嘗貽書與廬州公曰吾掌  
選九年未嘗修怨報復一人為汝等也親筆書余不及  
見先君子嘗為小子言之

鄭端簡公曉官文選時里中仕宦有餽金首飾者承筐  
而覆茗其上直以為茗也受之其夫人手撥茗知之面



頭發赤亟傳柝請公入以語公：不動聲色第令覆茗如初徐出名其人還謂曰吾初以家適乏茗故拜君惠頃入內詢之家尚有餘茗心謝尊意不敢當也遂令持歸

董大叅朴成進士後差過華容時劉忠宣公大宅憂在里造謁焉忠宣留之飯：麥精饌惟糟蝦一器董感省終身持雅操

明武宗御祭元輔靳文康貴文朕在東宮先生為傅朕登九五先生為輔朕今南巡先生已矣嗚呼哀哉語簡而意備按裴晉公自為誌銘云裴子為子之道備存於家牒為臣之道備存乎國史體裁略同

洪武舊制內侍不許讀書識字至宣德朝始以翰林官教讀內侍監其後司禮遂有秉筆太監一代弊政寔宣廟啟之也

今州縣戒石銘爾俸爾祿民膏民脂下民易虐上天難欺四語乃宋太語書以賜郡國立于廳事之南者按成都人景煥所著野人閑話其首篇載蜀主孟昶為文頒諸邑云朕念赤子旰食宵衣言之令長撫養惠綏政存三異道在七絲駟鷄為理留犢為規寬猛得所風俗可移無令侵削無使瘡痍下民易虐上天難欺賦輿是切軍國是資朕之賞罪固不踰時爾俸爾祿民膏民脂為民父母莫不仁慈勉爾為戒深體朕思凡二十四句



明世宗初志華亭石刻南雍曰徐階小人永不叙用後分宜得罪遂大用直至首揆眷注極寵渥荆石之言殆忘之矣

弘治五年吾浙鄉榜胡世寧孫燧王守仁三人同舉是年場中見三巨人後宸濠之變胡發其奸孫以巡撫死難平其亂者文成也三忠臣共成一事豈非前定因記宋寶祐四年登科錄第一甲一名文天祥字宋瑞小名雲孫小字從龍年二十第二甲一名謝枋得字君直小名鍾小字君和年三十第二甲二十七名陸秀夫字君實年十九是榜三忠臣死宋事皆少年尤奇天子為下作碑者唐太宗為魏徵高宗為李勣元宗為

張說德宗為段秀實宋太宗為趙普仁宗為李用和神宗為韓琦明太祖為徐達太宗為姚廣孝孝宗為張巒六部司屬皆書本部而都察院各道則直書道銜而不繫於院初謂各道得自彈事于院不相關白也按歐陽公歸田錄云御史臺故事三院御史言事必先白中丞殆非唐故事劉子儀為中丞始榜臺中今後御史有言不必先白中丞考唐時李承嘉為御史大夫名諸御史責曰近日御史言事不咨大夫禮乎蕭至忠答曰故事臺中無長官御史人君耳目比肩事主得自彈事不相關白若先白大夫而許彈事如彈大夫不知當白誰也李無以屈今之御史條陳事宜無不承總憲風旨者大



失立官初意矣

左寧南初畏流寇張獻忠之鋒避居九江遊擊胡以寧  
鈞致之遂任軍關廂一年巡道葉士彥以大義諷之仍  
返武昌乙酉南京立國監軍御史黃澍與士英構隙偽  
傳邸報藏太子詔良玉入清側澍從與之遂挾楚督袁  
繼成自武昌東下三月十七日至九江繼成標將郝上  
台相連四月初四日大肆焚掠良玉氣

金印白卷  
上醢其肉雜鹿肉煮之  
福祿美

白于財初無文采而好結交文士與大  
張友善以此有名諸生間初與同志  
二張名驟盛交益廣乃改名而復社

宏獎風流幾奔走天下而與楊願之交始終不渝前  
輩之厚道如此

楊琳者四川人舊以小吏給事張獻忠左右本朝順治  
末年隨孫可望降初授太倉州判陞吾郡臨安知縣嘗  
與人言獻忠破開封獲福王醢其肉雜鹿肉煮之以分  
餉將士名為福祿美

萬歷中無錫葉工部茂才參之權闕蕪湖已事上羨金  
數千奏曰久旱而得通故有羨金請不為例且進羨非  
臣志也神宗賜白金松布以旌之後官至南少司空  
衛與廠之設皆起永樂中其時事權盡歸閣部間有所  
監督收考則付之廠衛後二百年閣與衛皆廠之私人



失立官初意矣

左寧南初畏流寇張獻忠之鋒避居九江遊擊胡以寧  
鈞致之遂住軍闕廟一年巡道葉士彥以大義諷之仍  
返武昌乙酉南京立國監軍御史黃澍與士英構隙偽  
傳邸報藏太子詔良玉入清澍澍從與之遂挾楚督表  
繼成自武昌東下三月十七日至九江繼成標將郝上  
一作所統與左營相連四月初四日大肆焚掠良玉氣  
塞而死

常熟楊子常家富于財初無文采而好結交文士與太  
倉顧麟士姜東二張友善以此有名諸生間初與同志  
數人為應社其後二張名驟盛交益廣乃改名而復社

宏獎風流幾奔走天下而與楊顧之交始終不渝前  
輩之厚道如此

楊琳者四川人舊以小吏給事張獻忠左右本朝順治  
末年隨孫可望降初授太倉州判陞吾郡臨安知縣嘗  
與人言獻忠破開封獲福王醢其肉雜鹿肉煮之以分  
餉將士名為福祿羹

萬歷中無錫董工部茂才參之權闖蕪湖已事上羨金  
數千奏曰久旱而得通故有羨金請不為例且進羨非  
臣志也神宗賜白金松布以旌之後官至南少司空  
衛與廠之設皆起永樂中其時事權盡歸閣部間有所  
監督收考則付之廠衛後二百年閣與衛皆廠之私人



衛附殿以尊而閣又附衛以重清流之禍慘烈為前古  
所無本朝順治初年議復設殿北平張國獻時為垣中  
上疏極論其弊其事乃寢真定梁相國云

安慶設巡撫起於崇正初年用歸安沈司寇演之議也

天啟二一作三年遼東失守吳門申司馬用懋時為南太

常上言請建四輔以鞏神京東南建城於通州高米店

之間為左輔西南建城于良鄉盧溝之間為右輔西北

建城於鞏華城功德寺之間為右輔東北建城於密雲

順義之間為左輔敵由東北入左輔出兵以扼其衝而

右輔從左左輔從右各出兵夾擊如假道三衛右輔出

兵以扼其後而左輔從左右輔從右分兵追襲如直薄

都城下則京營堅壁各守無輕出擊四輔各設長圍以  
坐困之疏上不報

王元翰滇之臨安人以萬歷辛丑舉進士時四明當國

喜王之出其門而王之心弗與也由庶吉士出為工科

給事中抗章首劾四明次及紹興晉江以漸除其衣鉢

三公皆相繼引去其黨嗾御史鄭繼芳發難報復糾王

巡視廠庫姦贓以鉅萬計王盡出其篋衍昇置國門縱

吏士簡括罄身辭去漂泊東南不得還滇崇禎癸酉七

月死於南都客舍貧無為殮寃狀始白

明制翰林典試初無迴避本省之例嘉靖癸卯無華子

潛察以編修為江南主考是科瞿文懿公以易經中式



吳下少南字

後三年丙午典江南試者即瞿也至辛酉江南鄉試無錫吳編修情為主考同邑得雋者共十三人物議沸騰為言路所劾于是始定例本省人不得為主考載錢吉士同文錄批語中

葉赤國作葉

葉赤國始祖係蒙古人姓土默特滅扈倫國所居張地之納喇部一作納遂據其地因姓納喇後遷于葉赤河涯建國始祖名星根達爾漢生子席爾克明噶爾圖席爾克明噶圖生齊爾噶尼齊爾噶尼生褚孔格褚孔格生太杵太杵生二子一清家努一楊家努兄弟各居一城哈達國人多歸之兄弟遂皆稱貝勒萬歷十二年甲申寧遠伯李成梁以賜勅賞賚為名誘清家努兄弟至開

家字吳本作佳

家字吳本作佳

家作佳

家作佳

原繫漢壽亭侯廟中並從兵三百皆殺之清家努之子曰寨布為輔臣蘓克薩哈之祖楊家努二子長名納林布祿其弟金台石相繼為貝勒即今相國明珠之祖也與滿洲世為婚姻後滿洲強盛始為屬國蒙古土語呼白為察漢頭為托羅海一為干七漢木為母多自宣府西至喀爾喀所經之地有白頭一木而

地名

多作東

康熙癸酉五月上違豫京師為修齋禱禳之會初自諸王滿洲大臣行之既而漢中堂九御下至五城司坊大小臣工富高大賈莫不效尤或三晝夜或七晝夜或九晝夜各于就近寺觀設壇焚青詞以禱皇城內外緇



素黃冠奔走道路日暇給自五月二十三日<sup>不</sup>起六月終乃止

吏部選郎創從本部歷俸而至故副郎主事率皆後輩康熙三十四年六月德清設朱菴以事去特旨選用五部進士出身者房水袁靜公由戶部正郎調掌選在衙門為後進未到任前投同司副郎主事俱稱晚生亦變局也

永樂初北京四門鐘鼓樓等處各蓋舖房店房召民居住召商居貨總謂之廊房視衝僻分三等納鈔若干貫洪武錢若干文選廊房內住民之有力者一人食為廊頭計應納錢鈔銀收買本色解內府天財庫交納以

備宴賞支用今正陽門外廊房衚衕猶仍此名

明朝有宮莊屬慈寧慈慶乾清三宮取歷朝以來各府州縣沒官田地子粒徵銀濟邊而以其餘繫之進宮項下脩給賞之用謂之三宮子粒著為令甲刊之上供正額沈榜苑署雜記

東安門外稍北有禮儀房乃選養奶口以候內廷宣召之所一曰奶子府隸錦衣衛其制每季精選各里良家婦年十五以上二十以下四十名養之內曰坐季奶口別選八十名藉於官曰點外奶口季終則更之每遇不時宣取則就中選一人易高髻新衣如宮粧以進產男用乳女者產女用乳女男者後來夙戒奶口不稱其旨

不字上吳本有類字稱



時多別選城市婦人以應有雇值之費打點之費上納之費而奶子遂為一奇貨矣幸一見雷則終其身事所乳得沾恩澤無復出理其食報特隆云 宛署雜記

明朝籍田之禮先期一月順天府行宛平大興兩縣選集老人年高有行者數十人于本府氣候堂後隨班習儀預備牛犁穀種及耕斂器具良民二百餘人于地壇內搭蓋耕棚方廣五十餘步土取羅細數次覆黃土其上至期教坊司粧扮優人為風雷雨地土等神小伶為村莊男婦搗鼓鼓唱太平歌而縣民執農具各列籍田左右駕至左手執鞭右手執金龍犁稍前導駕二員牽牛老人二扶犁老人二執箕桶老人二夾駕左右名幫

耜臣凡往迴者三駕升望耕臺御座公卿以次親耕耕畢順天府治中通判推官各攜穀種箱一徧散地上老人牽牛覆土為耕種狀小伶百餘衣田家男女衣服奉五穀以進駕廻齋堂受賀畢宴三品以上官賜耆老及農民各饅頭二個肉二斤隨駕官民各執農具從牛門復賞老人各布二疋農夫各布一疋 宛署雜記

棋炒嘉靖三十年戶部行宛大二縣領太倉銀三千散給各燒餅舖戶每銀一兩上棋炒一石其法用白麩少和香油芝麻為棋子塊樣炒熟送至行軍處所支用 宛署雜記

明朝有女轎夫林鳳妻王氏等一百九十三戶查原籍



福建閩侯懷三縣人于洪武中撥送南京應當女戶永樂間隨駕北都專供大駕婚禮選妃及親王各公主婚配應用給與優免下帖令其男子在外供給免其雜差天順間各戶消乏告扯五城及宛平縣會同僉補嘉靖三十一年止存八戶八題僉楚相妻王氏一百餘人名補足末年楚相等陸續改撥錦衣校尉萬歷中復行僉補不許彘緣改撥宛署雜記

募戶明制宛平縣額辦酒醋局杏仁十一石五斗包麩紙三萬張募芽二萬斤杏仁紙招商市買原有額價惟募芽係土產之物而法又必取解者以是向來不議價止於鋪行銀兩內定腳價七兩責令近城居民數家依

幫

時採進謂之募戶城近園丁計畦領錢彼此相幫一家出名百家共貼其後歲令舊募戶報添二十戶一經報名各不相貼小民甚以為苦萬歷十九年內按院劉某訪行前弊行縣每草一斤議價二厘五毫召商辦進以前募戶并雜費名色盡行革除著為定額民困一甦宛署雜記

雜記

皇城內牆外曰內紅鋪明朝隸五府勳臣掌管巡邏凡有倒卧及縊溺尸骸請題隨駕錦衣衛官一員行據宛大二縣官相驗具印給結奏請定奪謂之駕相稍涉疑似送法司蓋以防內臣壅蔽故以耳目寄守土官也至正德末劉瑾用事權歸內衛而縣惟持空印結臨事填



之是否虛寔法司卒不與聞非若外郡縣三覆檢平之  
廷尉亭讞疑法豈外檢俱可疑而駕相可不疑耶豈在  
外者多斃於人而在內者俱自斃耶于立法初意不能  
無悖矣宛署襍記

衛一作街

明朝大臣賜第京師者胡忠在麻繩一作街李文正  
在灰廠小巷李閣老衛衛張文忠在五顯廟前張閣老  
衛衛李文達在東邊王府衛

景泰初開講筵每講畢命中官布金錢于地令講官拾  
之以為恩典時高穀年六十餘俯拾不便無所得此載  
蔣一葵長安客話按宣德中李時勉為侍講學士一日  
上懷金錢至史館撒之于地令諸講官拾取時勉獨正

撒吳本作撒

立乃呼至前賜以袖中金錢則其事不始于景泰朝

翰林院門左右飛沙積歲高與墻齊明世廟中掌院其  
嘗令除去官僚罷謫幾空未幾沙還積如故或以為形  
勝宜爾長安客話

明初六科在午門內與尚寶司相連今猶稱六科廊後  
因失火遷午門外長安客話

工部有銅匱四高可過人光祿寺有鐵梨木酒棕每棕  
用米二十石得汁百甕云是初明籍沒沈萬三家物  
明太醫院例子端陽日差官至南海子捕蝦蟇擗酥以  
合藥製紫金錠有御醫某者張大其事鼓吹旂幡喧闐  
以往或嘲以詩曰抖擻威風出鳳城喧々鼓吹擁霓旌



穿林披莽如虢虎捉得蝦蟆剜眼睛

明朝祖孫父子三代為尚書者惟福州林氏之家林瀚  
南京兵部尚書瀚子庭機南禮部尚書庭機子燠亦南  
禮部尚書

胡忠安公濬為禮部尚書自宣德丁未至景泰甲戌凡  
為會試知貢舉官

新舉人朝見著青衫不著襴衫開始于宣宗朝謂其異  
于歲貢生耳及其下第送國子監則仍著襴衫蓋國學  
自有成規也

明制各邊軍士從戰身荷鎖甲戰裙遮臂等具重四十  
五斤鐵盔鐵腦蓋重七斤頓頂護心鐵脇重五斤弓撒

箭袋重十斤腰刀三斤半蒺藜骨朵重三斤箭筒一斤  
通計共七十四斤半

曹文忠公鼐初為教官不樂願為繁劇一職改江西泰  
和典史進學不倦復修舉子業遂登進士及第入經筵  
尋入閣與政士林榮之

明孝陵即梁名僧寶誌瘞所傍有八功德水誠意伯奏  
改葬之乃見二大缶對合啟之誌公端坐于內髮被體  
指爪繞腰矣瘞既遷水亦隨往太祖異焉勅建靈寺賜

之莊田甚廣仍迎其像建塔居之命太常歲祭

董穀碧里舊存

成祖靖難後于都城四達之衢必建一聽經樓每夜令  
僧于上誦誦經義俾臣民席地靜聽之既遷都百年後

誌字上吳本有則字  
瘞作瘞字  
吳本靈字下有谷字

誦一作講



舊制盡失尚存其一于北門橋與十廟相近嘉靖初僧復新之人莫知為聽經樓之故址也

明初生員惟有廩膳增廣廩膳有額增廣無額成化中京師語曰和尚普度秀才拘數嚴陵姚夔時為禮部尚書奏請故附學立焉

唐時議謚之法無爵者稱子若蘊德邱園聲寔明者雖無官亦奏聞賜謚曰先生亦有門生故舊私為立謚者如孟郊稱貞曜先生之類是也後世三品以上乃得謚號而無爵之謚遂絕

唐制公卿皆搢笏于帶而後乘馬張九齡獨使人持因設笏囊自九齡始明朝公卿多有肩輿四品以下始乘

馬惟南宮京與外方面官迎詔送衣時皆朝服乘馬有搢笏于帶者有手自持者有人為持者以意自便無所謂故事

晉漢唐巾乃儒者之冠明興科甲監儒兼而用之不在此列者皆安分不敢僭用後來風俗僭侈平人以小帽為耻或一人僥倖科甲宗族姻親盡換儒巾曰蔭襲巾故諺有滿城文運轉徧地是方巾之語

永樂中禁中有剪柳之戲即射柳也元人以鵲鴿貯葫蘆中懸之柳上彎弓射之矢中葫蘆鴿飛出以飛之高下為勝負往會於清明端陽周賓所識小編

明制殿試在三月朔日成化八年以悼恭太子發引改



於十五日後因之本朝因 今上萬壽節在十八日復  
改期于後

相感下當有志字

桐城劉浩性好促織嘗出婁門見水濱一大蜂以身就  
泥中展轉數四起集敗荷葉上俄化為促織健而善鬪  
所當無不勝者見陸燦庚已編而物類相感不載  
仁和郎瑛所著名續已編內一段云福建布政朱彰景  
泰初謫陝西莊浪驛丞有西蕃使臣入貢一猫道經于  
驛彰館之問猫有何異使臣云向夕請試之以猫盛罩  
于鐵籠納空屋中明日起視有數十鼠伏籠外盡死盖  
猫王也使臣云此猫所在雖數里外鼠皆來伏  
大同初叛之歲失摠兵官所佩征西前將軍印職方請

給吳本作胡

給新印鄭端簡公時為主事白郎中總兵印文柳葉篆  
請改印文或稱別將軍或增減其字恐原印在叛軍處  
有事時行文奏報真偽不可辨誤事非小往年胡忠安  
在禮部失行禮部之印改鑄行禮部印在內衙門尚然  
況邊鎮兵權又反側不靖時乎郎中不以為然  
外戚封公自嘉靖中張鶴齡始駙馬無封侯者灤城富  
陽永春西寧皆以軍功封惟永康公主駙馬崔元以迎  
立世廟封京山侯

五月五日賜文武官走驃騎于後苑其制一人執旂引  
于前二人馳馬繼出呈藝于馬上或上或下或左或右  
騰躍躡捷人馬相得如此者數百騎後乃為胡服臂鷹

胡字吳本作胡



走犬圍獵狀終塲俗名曰走解音鞞而不知所自豈金  
元之舊俗歟今每歲一舉蓋以訓武也觀畢賜宴而回

彭時  
筆記

衛吳本傳街

六科皆內府不詳所自偶閱吳人陸鈇漫記謂光祿寺  
及六科皆內府衙門

東直門外二十馬房收草料每一房用太監三人每草  
一萬用銀二十兩其馬數不許查理亦曾有人進本乞  
查馬數發問克軍○通州秋青草自正統十四年積草  
為虜所焚自後今天津八衛打秋青草遂為例陸鈇  
漫記  
兵部尚書鄺楚一日向恭順侯吳某取五軍軍數吳以  
上閭廊走謝之以軍數非外人所預知此祖制也陸鈇  
漫記

太子冠禮凡三加初折上巾二遠遊冠三九旒冕陸鈇  
漫記

明進士賜瓊林宴畫席上七盃水南翰記

內諸司舍屋惟秘閣最宏壯閣下穹窿高敞謂之木天

永樂辛丑北京大內新成勅翰林院凡南內文淵閣所

藏古今書籍各取一部送至北京餘收貯封識如故時

修撰陳循如數取進得一百櫃皆舟載以進京至正統

乙巳南內災文淵閣向所藏書悉為灰燼姚福青  
溪暇筆

元時有只孫衣周伯琦詐馬行序曰華言一色衣也周

憲王元宮詞健兒干隊足如飛隨從南郊露未晞鼓吹

聲中春日曉御前咸著只孫衣吳郡皇甫庸近峰聞略

云元親王及功臣侍宴者別賜衣冠謂之只孫衣儀從

衣冠吳本傳街



所服團花只孫當是也按元史世本紀只作質

劉瑾用事時百官門狀啟禮悉用紅帟京師紙價十數

倍雖元老一作臣宿將必自稱晚生及門下生近峰聞略

宋制科先命從官各舉平生所為文五十篇于學士院

中選而後召試明宏治癸丑以前凡選庶吉士必先期

呈所為文于內閣謂之投獻猶有宋制科遺意後廢不

用近峰聞畧

明朝年號犯前代者涼張重華五代蠻張遇賢宋方臘

皆稱永樂元武帝太子阿速急八即位改元天順宋夏

主季乾順稱正德正德改元詔下馬冢宰試選人題曰

宰相須用讀書人論盖用宋太祖事議內閣也

李字吳本作李  
論字下吳本無盖字

吳本就字作成字

太祖于後湖中築一臺藏天下兵冊避火災也築屢潰

乃命囊所誅觸牒為基臺即就此洪武三年事也徐積

閣勝野

京師稱為極尊者曰老先生自內閣以至大小九卿皆

然門生稱座主亦不過老先生至分宜當國而諛者日

眾甚者稱夫子此後門生稱座主俱曰老師又有無故

而稱老師者不可勝記觚不觚錄

六年一京察乃成化以後定例至於考察科道則或以

輔臣去住而及其黨者唯嘉靖丙辰因星變命輔臣李本

本即呂掌部悉取六部九卿自尚書至尚寶丞及六科十

三道分別去留之盖分宜借此伸其恩怨也隆慶四年



有旨命吏部高拱考察科道官高請與都察院同事大者削少者謫其後高雖敗而斥者不復用

左右春坊中允入閣門內揖出用雙道贊善亦然而翰林侍讀侍講品故同中允然以本院屬官故揖則中庭出則單道獨至修書講筵主而京試則皆講讀先而中允後此衙門故事也明萬歷已邠南京鄉試忽以中允高啟愚先而羅萬化成法為之一變本朝各省鄉試翰林科員同差者必翰林官為止而科員副之康熙辛酉一作陝西鄉試江都許承宣以工科為正主考錢唐汪霖以編修為副亦一時變例也

分宜當國家人永年專為世著過錢署號曰鶴坡江陵

當國而家人子游七司其出納署號曰楚濱一時士大夫無不稱楚濱鶴坡者觚不觚錄

私鹽之禁至今日嚴密極矣嘗記宋時漕運自荆湖南

北米至真揚交卸舟人皆市私鹽以歸每得厚利故舟人以船為家一有損漏旋即補葺久而不壞運道亦通明文皇嘗謂侍從曰篙工柁師有少販鬻但無妨公不必究問其寬大如此今之盤詰私鹽者糧艘亦在石免犯者無論運官運丁一體治罪又加以關吏之權真無纖毫餘利以惠窮乏宜其計無復之侵蝕官米也

明朝開科始洪武三年而定條例自十七年始先是試尚仍元制二十一年始刑程文先是止錄姓名鄉貫試



相顧愕眙 昭字訛否

第七十六張九行

一作年始 陳鼎漫志

康熙四月 四月上當有年分如無查處當空兩字

第七十六張下頁二行

甲三甲一名各刊策丁丑會試五經常格

中以御史丁憂起復上京乘馬其配不能御車亦騎而從竟不索轎時仲稼叔子少傅讚娘在腹而司馬論則

傾討家居十九年既至與分宜抗禮怡分宜亦為異蓋衙門稱晚生惟七與否又新進者于掌院學士稱晚生

聖漫錄

殿試臚唱畢禮部堂上官捧黃榜鼓吹導出大清門一甲三人隨之餘進士則仍自西旁出此定制也康熙庚辰科閣臣孝感沁洲以本科會試總裁復充殿試讀卷官榜眼李愈探花王露皆其禮闈所取前列士對策書法大不滿上意是日捧榜止用禮部司官而一甲三人俱不敢由中門出此後遂相沿不變矣

康熙庚辰二月禮闈舉子場事已竣方鎖闈閱卷二十日夜明遠樓上忽有啼聲視之乃一初生嬰女不知所來自外廉官相顧愕眙以其事近怪不敢上聞越二日進五魁卷遂令一役送此女置育嬰堂中明日有人抱之以去後余至育嬰堂親問李老人果有此事亦人妖



錄定式自二十二年始一作二十四年始陳鼎漫志

正德戊辰廷試二甲三甲一名各刊策丁丑會試五經各刊文三篇皆異常格

吳本京字下有惟字

許襄毅公進成化中以御史丁憂起復上京乘馬其配高夫人素病眩暈不能御車亦騎而從竟不索轎時仲子司徒誥方在襁褓叔子少傅讚娠在腹而司馬論則其季子也

吳本季字下無子字

分宜當國時有一檢討家居十九年既至與分宜抗禮上坐用侍生白單帖分宜亦為異蓋衙門稱晚生惟七科前輩不論入閣與否又新進者于掌院學士稱晚生避馬馮夢禎快雪堂漫錄

殿試臚唱畢禮部堂上官捧黃榜鼓吹導出大清門一甲三人隨之餘進士則仍自兩旁出此定制也康熙庚辰科閣臣孝感沁洲以本科會試總裁復充殿試讀卷官榜眼李愈探花王露皆其禮闈所取前列士對策書法大不滿上意是日捧榜止用禮部司官而一甲三人俱不敢由中門出此後遂相沿不變矣

康熙庚辰二月禮闈舉子場事已竣方鎖闈閱卷二十日夜明遠樓上忽有啼聲視之乃一初生嬰女不知所來自外廡官相顧愕眙以其事近怪不敢上聞越二日進五魁卷遂令一役送此女置育嬰堂中明日有人抱之以去後余至育嬰堂親問李老人果有此事亦人妖



也

康熙四月十七早東直門已啟鑰而門扇牢合不可開  
若有物錮之者自郊達申内外出入不通雍擡者數千人  
司門兵役奔告九門提督以羊豕致祭戶樞旋開已近  
黃昏矣

庚辰五月初十日以後太白經天在張翼二星之間日  
斜乃見非晝見也

自鄭州至雄州一帶春夏之交雨水泛溢行者病涉恒  
以為苦按蘇子由使契丹時有贈知雄州王崇極詩首  
章云趙北燕南古戰場何年千里作方塘烟波坐覺胡  
塵遠皮幣遥知國計長又云城裡都無一寸閒城頭野

水四汗漫與君但對湖光飲多病偏須酒令寬則北宋  
時已為澤國當時引淀灤諸水以限戎馬之足遂成巨浸  
積漸使然也

本朝禁中宮殿門名大仍明之舊與酌中志所載畧同  
乾清門之內為乾清宮之東曰昭仁殿西曰弘德殿東  
宮及諸王讀書之所一在門之東曰東書房一在門之  
西曰西書房皆北向翰林院直廬曰南書房與西書房  
纔隔一垣循西廊稍北曰翻書房在月華門之南月華  
門北曰懋勤殿乾清宮正北曰交泰殿交泰殿正北曰  
坤寧宮有東西二暖殿坤寧宮直北欽安殿又北為  
御花園神武門自昭仁弘德而北而翼相北者東曰延



禧宮承乾宮景陽宮景仁宮長春宮鍾粹宮西曰翊坤  
宮永和宮咸福宮永壽宮啟祥宮儲秀宮御茶房在乾  
清宮東北御書房古董房在景陽宮內敬事房在景仁  
宮內中正殿在長春宮之西又西為咸安宮天亨殿在  
景陽宮之東以上皆宮門之內乾清門之東曰內左門西曰內  
右門北下東向者曰日精門昭華門基化門景和門近  
光左門西向者曰月華門端則門隆福門近光右門月  
華門之外曰隆宗門之西曰養心殿南曰慈寧宮太  
太后景和門之東為毓慶宮皇太子又東為寧壽宮皇  
后所此外尚有兆祥所遇喜所內永安亭南府西路  
南府中路東庫房西庫房鷹房大小狗房鳥鎔房鴿子

房祿房藥房露房等名皆不在宮殿之數

本朝內監數目乾清宮總管二首領四太監十九打掃  
首領三打掃太監七十八昭仁殿首領二太監七弘德  
殿首領二太監七懋勤殿首領一太監六自鳴鐘下太  
監九四執事首領四太監六十六御茶房首領二太監  
四十六上乘轎首領二太監三十七坤寧宮首領二太  
監十東煖殿首領二太監五西煖殿首領二太監六寶  
房即舊交泰殿首領二太監四延禧宮首領二太監十  
四長春宮首領二太監十二永壽宮首領太監俱不知  
數翊坤宮首領二太監十三永和宮首領二太監十啟  
祥宮首領二太監十四承乾宮首領二太監十咸福宮

字太監數目  
字注于下



首領二太監十七儲秀宮首領二太監二十四景陽宮  
首領一太監七鍾粹宮首領二太監十景仁宮首領二  
太監十近光左門太監四御書房在景陽宮內首領二  
太監九古董房在景陽宮內首領二太監四東書房太  
監三南書房太監三諸王子書房太監六西書房太監  
三翻書房太監二敬事房在景仁宮內首領一太監二  
十一御前太監四讀清書太監十二乾清門首領二太  
監六日精門在東宮首領二太監五月華門在西宮首  
領二太監六內左門首領二太監十二內右門首領二  
太監十景和門首領二太監六隆福門首領二太監五  
基化門首領二太監八端則門首領二太監七昭華門

首領二太監六吳本作  
太監十二

鏃一作鏃

首領二太監八近光右門太監五養心殿在月華門外  
正西首領二打掃首領二太監十五打掃太監八箭匠  
太監五按摩太監五鏃匠太監二學西洋醫太監二畫  
匠太監一鳥鎬太監八養心殿露房太監三裱房首領  
一太監六大殿鷹上首領二太監十九大狗房首領二  
太監二十九鴿子房太監三御花園在欽安殿後首領  
三太監二十三北小花園在宮後首領二太監七天熟  
火窖殿在景陽宮東首領二太監四中正殿在在長春  
宮西太監十欽安殿首領二太監二十四熟火房首領  
一太監十二柴灰所首領一太監十五燒炕首領二太  
監十三地祥所在神武門內首領二太監十書房太監



阿哥下太監六十吳本  
無十字

四遇喜處首領二太監十所內總管一首領九太監四  
十三永安亭首領三太監十七南府西路首領三太監  
二十九南府中路在瀛臺南首領二太監九南薰殿在  
內西華門內首領一太監二十五咸安宮首領二太監  
三十二慈寧宮佛堂首領二太監六。喇嘛首領二太  
監。管門首領二太監。花園首領二太監。寧壽宮在毓秀宮  
監。二打掃首領二打掃太監八。東太監數未查毓慶宮  
殿上首領一太監四。太監四。十。鷹上  
一太監八。狗房首領一太監二十。四。執事首領二  
太監十六。茶房首領二太監十七。鳥鏡太監五  
。打掃首領。睿前太監七十三阿哥下太監七十四阿  
哥下太監七十五阿哥下太監五十六阿哥下太監六  
十東庫房阿哥下太監四西庫房阿哥下太監三

三月初旬榆莢方生時官厨采供御饌或和以粉或以  
麩內直詞臣每蒙賜食余有詩紀之

湯山在昌平州東南山下有湯泉行宮在山之東跨泉  
為浴池癸未五月隨駕駐此偶閱曹能始名勝志云温  
泉出昌平西北二十五里之湯峪初疑志訛是日作詩  
因詳注此段進呈明日 上賜御札云此湯非舊有康  
熙二三年間轉輔臣時人始知之病者浴此甚有益昌  
平州西北湯峪之泉故在非志訛也御札隨繳進謹錄  
于右以見 皇上之精于考證如此

古北口外有老樹根為沙水浸潤歲久發光以刀削去  
薄皮肌理瑩徹大者合抱小者如臂指皆透明如琉璃



水精夜置暗室中照見細字因呼為夜光水出水半月後濕氣漸乾光亦漸滅成枯槁矣真物理之莫解者此樹亦不知名

猴頭麻菰產鞞子嶺附近山中者一枚重斤許味厚如榆肉而鮮美過之元楊允孚灤京詩更說高麗生菜美摠輸山後麻菰香自注云尖山產麻菰按元之灤京去此不遠物產正同又有一種生牛馬糞堆者名沙菌亦可采食但形味差薄耳

山中有野杏樹枝幹多被野燒所焚其根堅韌入土不爛有花紋而香以為筆架及小香几玲瓏可愛御前俱斷用之余受賜者用作小鏡架名之為蟠木

鞞一作勁

蟠一作幡

去熱河九十里入蒙古科爾沁界其地有湯泉上坐湯回論諸臣云朕坐湯凡二十二處所至必令西洋人以銀盃盛水重湯煎之俟水乾驗盃底或硫或硝或鹽或砂各不同至其舒筋骨和血脈則一也

蒙古阿巴海部落地名克俄里有泡子河產天然鹽生水中如層冰厚四五寸許鑿取成磚不事煎熬而可食其味較中國食鹽稍淡又有產于高山者彌望如雪人跡不能到則用強弓仰射取之又產精鐵色如白銀今上用烏鎊皆采此鐵製造往聞明季嚴禁關口不得出鹽鐵等物謂可坐困外國豈知彼中物產固自不乏耶



次上營下吳本有子  
字

口外避暑行宮 皇上取朴素之義命曰山莊自西間  
房起次鞍子嶺次黃甲營次樺榆溝相近有釣魚臺亦有樓閣然非宿垣  
次喀喇火屯蒙古云喀喇譯云黑色其地本名黑城亦  
云烏城次上營一名熱河次藍旗營次波羅火屯一名  
皇姑莊其地與蒙古四子部落相近次唐山營凡九處  
宮殿之制繪圖如一惟喀喇火屯地形寬衍溪山尤勝  
行宮之後復創苑囿黃甲營向係腰站殿宇無多駐蹕  
歲不過一宿而已

塞山有毒草中人肥膚毒甚蜂蠆自唐山營踰汗鐵水  
嶺而外徧地有之俗名蠟子草蘆高四五尺葉如麻嫩  
時可供馬秣經霜則瘁螫不可觸

椴字吳本無木字

椴樹葉與烏桕相似而大如團扇有鉅齒初生時可裹  
餅餌蒸食霜後鮮赤若丹楓照耀岩谷其皮柔韌如麻  
烏喇之人采以治繩作魚網入水不濡可為烏鎊火繩  
中國所無也按本草人參條下所載椴木音賈而此音  
斷不同

細鱗魚產灤河中旁近溪澗多有之重唇鱗如筋中有  
黑斑大者一頭重斤許味極鮮腴又有柘綠魚味與細  
鱗畧同而形差小又有柳根未長不過二三寸入釣最  
多竿不虛舉此魚聚族緩流中好食柳根故名  
駱駝有紫色白色兩種蒙古與中國貿易廳健者每頭  
直價二三十金以其卧而齧草腹不貼地故曰明駝



行圍駐蹕之所擇地勢平行者刈草削土測景向正南  
中立帳殿外設幔城以黃布為之開東西南三門幔城  
外四面又設網城一重羽林周廬環繞網城之外相去  
率百餘步惟內廷扈從詞臣設帳房于南門三十步內  
以便不時宣喚也

烏喇奈山果也一名歐李叢生樸檉間紅如珊瑚比櫻  
桃而大味甘微酢蜜浸可以致遠蒙古諸山處有之  
玲瓏山溝口蒙古名為生濟圖火羅昂河有水不詳其  
名源自白旗營流下塞外諸川此為最大商人伐巨松  
成段散置斯干遇暴雨水漲則順流而出以道里揆之  
當亦達於灤河從永平南入關者

雍安嶺塞外諸山最高處嶺上多白沙故名其山  
東連長白西界五臺嶺下為東西四旗舊營外即蒙古  
克什黑屯部落北去百餘里直走早海矣或云此嶺之  
北即陰山恐亦未必然嶺上喬松插天不計其數葉短  
而勁八月杪被霜黃落與凡材無異名落葉松蓋茲山  
下臨沙漠朔氣高寒真不凋之木也

黃羊興安嶺上獨石口一帶草中有之高三尺餘背毛  
淺黃色腹下白百十為群每合圍遙望拍如鴛鴨所  
得以千計有耳無角尾似麀聲似鹿本鹿類而以羊名  
本草謂黃羊狀與羊同腹下帶黃色者猶未得其真也  
虎有威骨長寸餘在脇兩旁肉中不附筋骨初生時骨



平如一字年深則曲而為乙字其力始猛所謂虎挾乙也東宮行圍時曾以一枚見賜後以與李氏外孫女云可辟邪

野猪毛深黑色高五六尺長八九尺絕有力上下四牙長出口外人莫敢攖弓矢不能勝利用火攻味之美尤在皮行廚以供上膳非拜賜不得食

熊之力大於虎倚樹而立獵者不敢近必先以狗撩之俟其出林然後人力有所施鎗箭競加其計無復之則騰身上喬木之杪拗樹枝以擲人；以火器仰攻力盡乃墮有猪熊人熊馬熊樹熊石熊之別余所見者乃石熊也本草云背上脂為熊白味甚美不知腹中之腴拌

墮一作墜

糖霜皆可生食也

大凡打圍惟在得鹿他如豺狼狐狸諸獸圍未合時往往多竄出者鹿之類不一十嘗鹿中纔得一鹿十牝鹿中纔得一牡鹿牝無角而牡有角老鹿之角有長至丈許者此為絕有力箭已洞胸背腹負痛疾馳尚能踰險越阻行數十里而乃斃白露後秋分前極肥過此漸羸瘦矣

合字下吳本無時字

哨鹿之說遼史已有之但未詳其法今特志之每歲于白露後三日獵者衣鹿衣戴鹿頭天未明潛伏草中吹木筒作聲牡鹿聞之以為求其偶也遂躍踴而至則利鏃加焉無得脫者



謂字下吳本無之字

鹿茸初解角時其長如蘭粟蒸而食之嫩如乳酥色白而微紅余陪獵三回僅得一嘗香味而奇絕世謂之江瑤柱食品無對惟此可與相匹

獵塲草深沒馬腹山雉最多而肥驚人決起高飛不能及遠旋復入艸中從行者往；徒步取之易如拾蚌蛤每日暮回營人；馬後必帶數尾以供晚食間有飛入帳房中宴坐而獲者重陽以後瘦不中食亦如鹿過秋分則羸時候使然也

飛狐本蝙蝠之類毛深褐色銳頭缺口似兔而長尾之長與身等肉翅如鰲裙四足生翅中前足四爪後足五爪能飛不踰尋丈 上於必忒舍勒圍中親射得之

塞山積雨草中產蜥蜴長四寸許頭以下色如翡翠有紋勻細如魚鱗尾作泥金色吐氣為雲喀喇火屯一帶有之土人呼為雲虎

千年老松瘦削之作瓢可貯水一二升許又落葉松根出菌芝莖紫赤色皆可克几案間物避暑時 上嘗頒賜扈從文臣余所得二芝一瓢他日可為初白菴中清供也

順風耳西洋巧工所製以銅為管節節相續約長丈餘如千里鏡之式虛其中口大而末小向空中傳語自上而下相去五六里聲息相聞此器亦從古所未有殺虎時往；用之



一日 上在行宮出示石子二枚其一黃白色形圓中空貯水映日則見其一紫色中有水一滴如唾珠隨手轉換石面上向則珠反下走石下向則珠却上升循環無端疑即空青之類本產蒙古山中而彼不知貴也塞外有山果名烏沙兒契深紅色味似烏喇奈而微苦核扁如瓜子其枝大者可為弓幹細者可為箭筈亦材木也本草不載

戶部西庫中有書五十樹康熙癸未九月杪奉 旨着養心殿供事向庫中檢查僅得三吳水利及蔡忠惠文湖州集共三種據回奏云此外率殘闕不全吾不敢信也

利字下吳本有考字

癸未十月初五日殿試武舉黎明傳 旨南書房先後隨駕翰林少詹陳元龍諭德查昇陳壯履編修汪士鋐錢名世庶吉士汪灝查慎行蔣廷錫八人俱着隨往紫光閣看武舉校射余輩隨赴西苑候駕已刻 上乘舟至先率東宮諸王各射步箭一回然後陞寶座讀卷官自大學士至少詹共十四員于幄殿東南西向坐余輩八人以次班坐於後申刻武舉一百人馬射既畢諸臣移坐東向復觀武舉步射每十人為一棚每人射畢又各試技勇甫三棚日已下春 上率東宮以下又射箭一回乃回宮明日午後校射始畢選十三人充御前侍衛吾宗三百年來未有登武榜者是科族叔靜安始冒

觀吳本作觀



朱姓成進士余與聲山名不在讀卷之列蒙恩得坐班與觀亦一門盛事也

每年十一月初一日宮中始燒暖炕設圍爐舊謂之開爐節十二月二十四日乾清宮庭前設萬壽燈八仙望子四架二十六日各宮殿俱掛門神對聯二十八日宮中及甬道東西兩廊設五色羊燈此歲例也

壬午十二月二十三日各衙門已封印而日矣忽有旨召各省新授習學臣入南書房候考御試題夫子循循然節制藝一篇奉和 聖製為考試嘆五律一首午後呈卷明早復集內廷俱依擬用人賜御書一幅而出所用十一人翰詹衙門計十人部曹止一人乃翁高年

康貽也自是翰林院官頗為諸曹所忌蓋舊例除北直江南浙江三省學院而外其餘各省學道多以部郎及外府俸滿進士出身者充之今一變其局疑有他故其寔出自宸斷與在廷無與也

元旦宮廷內外朝儀五鼓駕親祭堂子各官俱朝服于午門外送黎明駕回宮先至奉先殿繼至寧壽宮行禮畢然後乘輦出御太和殿受外廷朝賀辰刻復回乾清宮庭前樂作上陞寶座垂簾樂再奏宮嬪于上前行禮畢樂三奏簾捲東宮諸王以次在殿庭行三跪九叩頭禮樂四奏公主郡主于宮中行禮樂五奏上御西煖閣內外諸臣俱集午門內望毓慶宮行兩跪六叩頭禮禮



畢始散班

八十七

暢春苑向未有直廬供事之員皆就近僦居以候不時  
宣喚康熙癸未正月余與汪紫澆家聲山三人隨駕赴  
苑上親指小東門沿牆向西屋五間為祇候之地其  
秋改作三層南向而以直南三間為翰林直房後二層  
為畫院自是入直有定所與南書房同

西苑張燈自正月十四夜起至十六夜止癸未上元前  
二日有旨查昇查慎行汪灝自明日為始連夕俱至  
西廠看放烟火至十四夜酉刻內侍一人導金輩三人  
自小南門入沿河北行里許經勤政樓下穿網城西渡  
板橋寬數百畝壤平如削當樓之正面設燈棚一架高

起六丈餘稍南為不夜城中列黃河九曲燈縛秣稽作  
坊巷衲衲徑術迴複往來而易迷燈之數不知其幾  
每一燈旁植一旗五采間錯日初落千百燈一時先燃  
其北列柵方廣約五六里散植烟火數百架黃昏上御  
樓西向坐先放高架烟火謂之合子最奇者千葉蓮花  
合子既畢人氣尤靜須臾橋東爆竹發藥線從隔河起  
飛星一道倒曳有聲倏上倏下列入柵中縱橫馳突食  
頃火光遠近齋著如蟄雷奮地飛電掣空此時月色天  
光俱為烟氣所蔽觀者神移目眩震撼動搖不能自主  
移時烟燭盡消而九曲黃河燈猶熒熒如繁星也內官  
舞龍燈者至樓前伺候金輩乃出宮殿下二鼓矣十五



十六兩夜皆然其後歲以為常但取道苑北門不復從南門入矣

進士釋褐例在國子監柏樹下康熙癸未因修葺太學工未竣先師先賢牌位俱移<sup>後</sup>順天府學新進士即於府學行釋褐禮一甲三人入大成殿分獻余與紫滄分獻兩廡再行三跪九叩頭禮然後赴彙倫堂謁大司成行四拜禮畢登堂就席一甲三人在中間授庶常者在東間餘進士在西間各飲三杯揖司成而退

上留心醫理熟諳藥性常諭臣等云聖賢道理俱有一定之論至於醫卜星相言人人殊世間庸醫于寒熱虛寔率未能辨南人喜用補北人好用瀉皆非適中之道

大抵溫補之藥其效甚微酷烈之藥其效立見方書所載湯頭甚多若方可療病何用屢易西洋有一種樹皮名金雞勒以治瘧疾一服即愈可見用藥只在對症也養心殿送到萬首唐人絕句一部真南宋本前有洪容齋序紹熙元年刻於越州蓬萊閣初止四十卷既而容齋歸鄱陽續刻成書遂滿萬首之數每一卷計詩百首共一百零一卷紹熙三年奏進重華宮壽皇稱其精博賜茶一百斝清馥香十貼薰香二十貼金冠一百兩邁復上表謝恩前後劄子奏狀俱載卷首至嘉定癸未新安汪綱守越遂榻鄱本并刻之今此本即嘉定中合刻者但檢對目錄現存僅七十五卷缺二十六卷為可惜

紹熙吳本作紹興



耳

經筵舊例先五日掌院學士擬進四書二條書經易經各二條候御筆點定講官始撰講章再經繕清進呈臨時備用甲申春舉經筵掌院所擬題槩置不用經書二條皆出 上裁四書子貢問一節尚書汝二十有二人欽哉惟時亮天工二句二月二十九日午後方發下是月漢誦官為華亭王大司空吾邑陳正詹倉卒撰擬為期甚迫三月初二日黎明 上御文華殿進講畢賜茶而退經筵例有筵宴停止自茲始御前發下白玉引首圖章一枚篆文廣仁殿三字奉旨考完出處記得金史章宗泰和七年台對群臣于廣仁

殿又查禁扁目錄金初都燕後移汴宮殿扁額亦有廣仁殿之名但所造年月則無可考

唐伯虎相城水村圖畫卷宣紙小幅濶纔半尺長六尺餘水墨濃淡點綴生動楊柳共三十四株江橋村市出沒水氣中後有王文恪公五言古詩一首伯虎次和最後又有盧襄次韻一首相城沈石田所居時石田下世文恪與伯虎往弔舟中作此一時興會所到筆墨之痕俱化平生所見伯虎画此為第一甲申五月十五日御前發下裝潢裱房在西苑直廬之後與王麓臺前輩同觀

皇上精於算學常著三角形論以示內廷諸臣茫然無



以解者一日面示臣等算法先聚米一堆于案上用軟  
尺量之圍五尺三寸五分徑一尺七寸高五寸三分積  
數得四千。九寸復以堆塚法一百二十五寸除之  
得三二。七之數隨用一百二十五寸之銅斗量之不  
差累黍又頒示一寸斗一八寸斗一十八寸斗一斛水  
于中大小隨其所受寸寸而積盈縮不爽御筆推算法  
一紙今存家少詹姪處

嘉量集經三卷律呂正論六卷明鄭世子載堉著其書  
推原造歷之本大約謂古人以度定量以量定權必參  
相得而後黃鐘之律可求律與度量衡相須為用非度  
量衡生于律也因將累黍推定三器並歷代沿革損益

著之於篇此書不多有于御府曾<sup>見</sup>之按鄭世子之父恭  
王被誣禁高墻世子不敢居內寢築一室王門外席葦  
以居與王居高墻之年等後恭王薨世子遁之山中讓  
爵於盟津王之子見泚有子臧季札之風

御苑蒲桃凡十種甲申十一月十日頒賜南書房諸  
臣御製詩云休誇大宛貢莫笑漢宮傳十種標名異千  
條帶葉鮮隨班命內侍分賜到諸賢飽食和心胃歸鞍  
賦木天此詩原藁存家聲山學士處十種者一伏地公  
領孫二伏地黑蒲桃三伏地馬瑙四哈密公領孫五哈  
蜜瑣瑣蒲桃六哈密綠蒲桃七哈密紅蒲桃八哈密白  
蒲桃九哈密黑蒲桃十馬乳



經字吳吉

除夕前三日內廷日直諸臣人賜全鹿一隻風羊二隻  
兔八隻野雞八隻鹿尾四枚關大魚八尾黃封酒二壇  
此年例也甲申十二月加賜 御書經尺大福字一幅  
對聯一副綠石硯一方歲不為同例

內府收藏書畫余在廷曾見者不計其數今錄其尤妙

者共三十五種以備遺忘絹本小楷曹娥碑後有昌黎

又宋高宗跋書澄心紙上又謝端本喬黃成趙子昂  
三跋又虞集前後共十跋今上御題跋一

鵲華秋色圖卷子宋箋高六尺長六尺楷書九行褚河  
為周草窗作後有董文敏五跋

南西昇經樂毅論楷書墨蹟姓不書張澤端清明上河圖

卷子絹本長燕文貴做王摩詰關山霜霽圖卷郭熙蜀

山積積雪圖卷趙子昂百駿圖卷右軍黃庭經小楷本

楷本唐人臨本米芾山水卷陳所翁九龍圖趙千里後赤壁

圖卷黃荃設色花卉吳彩鸞細楷唐韻顧野王草蟲卷

關立本步輦圖關立本洛神賦燕文貴長江萬里圖劉

松年江上雪霽圖東坡墨竹虞世南廟堂碑真蹟黃公

望江山勝覽圖卷宋僧牧溪果蔬烏雀圖卷錢舜舉白

雲紅樹圖趙千里大禹治水圖卷首有王穉登八分後  
有曾榮詩陳繼儒跋

徐熙鈎染花卉翎毛長卷唐六如水村圖管夫人白描

大士像唐陸柬之書文賦真蹟劉松年五百阿羅漢卷

趙雍畫馬有董其昌跋李龍眠白描五百羅漢卷李北海大

照寺碑真蹟周昉美人浣月圖黃子久秋山雨意圖後  
有

元人李忠  
倪瓚二跋



龍蝦產閩廣海中長丈餘通身十七節頭似龍有角脚  
長數寸鬚上有毛甲如玳瑁尾五株皆倒捲韓昌黎詩  
云又嘗疑龍蝦果誰雄牙鬚乙酉正月初四日在南書  
房上遣內官傳示始見之

乙酉八月杪圍場既撤駕自興安嶺一帶巡邊入張家  
口廿八日駐上都必拉廿九日早沿路閱視群牧先諸  
王子馬群次正藍旗次鑲白旗次正白旗其餘各旗牧  
地稍遠不及趕赴自上都必拉至諾海和碩五十里間  
駝馬牛羊彌望不絕皆數年中賜種孳息者每位諸王  
下馬駒二千餘匹八旗每一牛录有馬一千二三百匹  
餘畜產稱是三十日早發諾海和碩先閱鑲黃旗畜牧

次閱太僕寺官馬馬駒一萬三千餘匹上召途緩轡  
選其駿異者歸上駟院計程七十餘里抵搭班托羅海  
駐蹕九月初二日自烏蘭腦兒查木哈兔腦兒閱視慶  
豐司羊羣計二十六萬頭又東宮監牧四萬頭共羊三  
十萬初三日閱視牛羣約十萬餘是夕駐託里潭腦兒  
初四日閱視上駟院馬駒每羣以毛色為別白者青者  
黑者紅者黃者紫者雜色者散布山岡望同雲錦為數  
約二十萬四十里抵昂烏力海巴拉漢典牧官員屯聚  
于此過此六里駐蹕初五日上御幔城南門觀調生  
馬先賜南書房翰林官馬八匹賜隨駕摠兵副將各官  
人各馬一匹初七日至西巴里臺上諭云此間尚有



上駟院馬二十一羣向經調習者每年春夏放青九月歸廐今歲因朕巡邊恐馬力疲乏留備更替故不令趕來 上又諭云明朝養馬大累民間我 太宗時以獨石口至張家口山北帶水草肥饒指為放牧之地今歷數十餘年孳息既不累民亦不費官自古馬政之善無如本朝者

自興安打巴漢三十里至渾布拉噶五十里都倫那拉又名上都海拉思台四十里庫勒班庫特勒四十里額勒屯色欽六十博羅活屯上都必拉五十里諾海和碩七十二里塔班托羅海五十里烏蘭腦兒五十里查木哈兔腦兒四十五里托里渾腦兒四十五里昂烏力海

巴拉漢五十五里哈木虎布兒喀四十里西巴里台十五里察罕托羅海二十里陀羅寺三十里張家口五里下堡城六十里宣化府十八里泥河十里鷄兒梁響水舖二十里上花園十里下花園雞鳴山十里雞鳴驛十五里新保安二十五里沙城二十里土木驛三十里懷來縣有廣慈寺二十五里榆林堡二十五里全道五里八達嶺三里青龍橋三里石佛寺二里彈琴峽五里居庸北關十五里南關二十五里文頭六十里錫春苑共二十二站計程一千零八十三里  
張家口內保安沙城一帶地產沙蓬實如蒺藜中有米如稗子食之益人本草所不載



蓋草一名菘豆亦名王芻本草云此草綠色可染黃古者貢草入染人故謂之王芻詩經蓋臣取進忠之義當本此

乙酉十月六科缺員奉 旨將翰林院編檢改補初四日掌院學士啟奏考選日期南書房翰林及日講官俱着一體開列余與張衡臣錢亮功蔣揚孫四人時在直廬奏乞免開職名不願改授言路奉 旨俯允初六日召見翰林官廿九員用王懿史申義鄭際泰管灝陳允恭周道新楊顯張大有李紹周九人蓋向來科道員缺例以庶吉士出館而未授職者換補今已授職復行改用似以臺垣為編檢升缺惜此語不敢上奏也此例開

自庚辰在本衙門為疏通之路而編檢品稍降矣

會試總裁歷科以來二正二副例用四員丙戌會試止用李少宰澠彭少司空澹二人先奉嚴綸戒飭放榜後為浮言所中會元尚居易以文體不正黜草殿試榜發黜落者四人罰科者十一人奉 旨將會試總裁及房考三人交都察院議處俱落職南宮變局也

丙戌四月朔庶常當散館 上在西苑考試滿漢庶吉士三十八人 御試題存心養性為匪懈論一首賦得人畫農桑力五言排律十二韻余與錢亮功汪紫滄蔣揚孫四人先經授職不復與考初六日 命下留館授職者止十五人其餘再行教習者二十人草職者三人



兩掌院俱降三級留任視癸未又加嚴從來殿試進士以館選為榮極盛必衰固其理也

每科選館 皇上御保和殿漢滿大學士于煖閣內站班掌院學士立煖閣下向西一甲三人排立掌院後諸進士以次分班唱名每十人為一班由殿東入跪奏姓名籍貫及鄉會試名次選館者留殿中與鼎甲挨次立唱名畢諸大臣各賜茶 上升輦回宮此定例也丙戌四月二十六日 上不入朝即于西苑澹寧居舉行此典新進士二百九十餘名俱從東南奉事門入 欽點庶吉士四十八人浙江九人吾季弟潤木與馬先是癸未科余授庶常時仲弟德尹以編修在殿門坐班今日

余在苑門復見季弟館選兄弟三人八年之中俱備員詞苑不可謂非一門幸事也

口外草木可當茗飲者有三種一種紅蓼花根蒙古呼為色都滿洲呼為色爾布一種即落葉松皮一種名奢木子亦名瓜子兒茶其色紅

口外有一種草長尺餘六月開花似虞美人重臺淺紫色每本三椹結子如桑椹因地椹壓其漿熬成膏點湯飲之味極芳甘盛以玻璃杯色尤可愛

山莊九處黃甲營地稍窄餘八處多有直廬在行宮二門內東朶殿之後平屋三間西向庭前設棚以禦暑扈從詞臣每黎明入直一如在西苑也其樺榆溝喀喇火



屯上營子三處隨 駕大臣皆賜官房為止宿之地大抵 皇上清暑六七月之交于三處駐蹕為多故詞臣亦得受廛兩人共住三間紗櫺木榻用庇風日過此以往率就草地支帳房與羽林列幕者無別矣

從烏喇哈帶東行四十五里地名阿赤你巴蒙古謂兩山交會處也又自北而東渡一溪行十里許有柴柵茅屋又東二十里渡西東兒哈溝為岳七利台吉營盤所居新葺瓦屋四層環以土牆旁有喇麻寺亦用瓦蓋

上初幸其居後移住幔城岳七利者翁牛特部落貴人也又東北行二十里為坤維火羅又東為巴顏打巴漢上下約三十餘里嶺下即翁牛特部落駐牧之地其地

舊名嬰阿今改名巴顏爾贊平壤一區清流貫其中四面山勢環拱如城郭時八公主下嫁于都倫郡王瓦殿六重工部官為營建者丙戌八月初八日 上送公主親至其地向來圍場所不到也從此望西北行五十里為木克帶道旁溪百冲昂阿又西四十餘里為木克帶道旁有湯泉折而南行十餘里乃折而西又十餘里至汗必力阿打巴漢昂阿去白空不過三十里矣

丙戌九月十四日自獵場回鑾駐波羅火屯內侍李玉傳 旨問每科舉人進士所給水程牌坊銀兩數目余輩回奏云所給銀兩各省數目多寡不一祇就浙江言之新科舉人例給銀四十五兩進士于布政司庫領銀



一百兩士子均沾實惠蓋謂上意恐被有司侵蝕故有此問也覆奏後復傳旨云旌表節孝止給牌坊銀三十兩此項似覺太多遂下部議自後新科進士着于戶部領銀三十兩永以為例裁減牌坊銀兩自本科始時會場已過俱照舊給發一百兩仍行文本省如數追扣追

韻府羣玉一書元延祐間新吳二陰所集一名時夫字勁絃一名中夫字復春博學而多聞因宋王百禄所增書林事類韻會錢諷回溪史韻等書會粹而附益之洪武正韻初成定為七十六韻洪武八年重刻是書依新定次序而字下所繫諸字並從陰氏之舊宋景濂有序

今世之所傳者又與明初刻本不同

明月錢見洪遵泉志奇品中徐氏曰此錢文曰明月按此錢徑九分重四銖二分製作鏤薄形質簡古外無輪郭背文明月徹舊譜所圖與此小異又不載輕重大小計得其名而未見之也云壬辰正月余偶從慈仁廟中購得十枚與泉志所載形模適合明月二字俱篆文但不知鑄自何代漢以後又無此年號不可考耳

內西華門外西南一里許明朝御用監在焉又南數十步為真武殿庭前有老檜一株下有元時玉酒海承以石牀玉色青碧間以黑章旁刻魚龍海馬出沒波濤狀口面約廣三尺餘隨其質為凹凸若荷葉然形製古朴



膚理溫潤中容四五石許壬辰正月十九日偕雲間高  
不騫槎客往觀摩杪久之按元史世祖紀至元二年十  
二月瀆山大玉海成勅置廣寒殿輟畊錄云廣寒殿在  
萬歲山頂中有小玉海殿內設御榻左右列侍臣坐牀  
前架黑玉酒甕一車駕歲巡上都先宴于此燕都遊覽  
志云今御用監中有小亭內有一玉缸體質頗潤中積  
水外以朱欄護之即廣寒殿中物也  
南海淀今為御苑設甲兵守之間遇上元于此放烟  
火則縱都人往觀餘不得入

此記為西莊浩亭查翁手鈔而又以所謂吳本者親自  
重校仰見前輩虛心勤學乃如是今其外曾孫顧梅脩  
同研出以相質余因以嚮所錄朱本對勘後得訛字數  
十補遺兩條亦聊為掃葉之助惟與本條解先後參差  
不知誰氏本為是聞戊戌之冬先生遺墨重付鬱攸矣  
感此記桑梓中尚有藏者再當訪之以訂正可也然鄙  
意欲釐為兩卷本朝典章及先生際遇列於上卷而  
以遜國故實佚聞入下卷他日或以此付剞劂雖與原  
書次第不符而於體裁猶未為乖也商之梅脩以為然  
否道光歲乙巳春三月同里王璿漱玉氏甫校竟附識



光緒丙申秋八月棹過星滄訪吳氏拜經樓遺書散失殆盡於叢殘中檢得數十冊惟此尚屬完善携歸舟中校讀一過見卷首眉端朱字燦然猶是槎客先生手筆惜序闕數帙俟異日向藏書家借錄補之戊戌三月裝竟蓉溪渙徐光濟跋於紫來閣之北窗下

渙下脫一隱字



徐光濟



書名 海  
版次 三  
定價 30  
編號  
北京大學圖書館

海